

المشروع القومي لتوثيق التراث المسرحي
من مكتبة الفنان علي الكسار

رواية
بشائر السعد
١٩٢١م

٢٢



بشائر السعد
١٩٢١م





أ. د. أحمد زايد
رئيس مجلس الإدارة

د. محمد سليمان
رئيس قطاع التواصل الثقافي

د. أيمن سليمان
مدير المركز

م. ياسمين ماهر عبد النور
إشراف عام

أ. أميرة صديق
مدير المشروع

هبة السيد خضير
منسق ومستول توثيق التراث المسرحي
إخراج فني وتنسيق

جيهان أبو بكر
أسامة عبد الله
إدخال البيانات
مصطفى النادي
مسح ضوئي

منى صبري
مشاركة في تدقيق النص
ولاء علي عفيفي
معالجة الصور

هشام إحسان
مروى يونس
تصميم الغلاف

شكر خاص لكل من:

الأستاذ ماجد علي الكسار الذي أمد المركز بمكتبة الفنان علي الكسار المسرحية.
كريستين ميشيل وباسم العجيزي لمشاركتهما في أعمال رقمنة ومراجعة الروايات خلال فترة عملهما بالمركز.

المشروع القومي
لتوثيق التراث المسرحي
من مكتبة الفنان علي الكسار

بشاير السعد
١٩٢١م



مكتبة الإسكندرية بيانات الفهرسة- أثناء - النشر (فان)

بشاير السعد، 1921م. -- الجيزة، مصر : مكتبة الإسكندرية، مركز توثيق التراث الحضاري و الطبيعي، 2026.

صفحة ؛ سم. (المشروع القومي لتوثيق التراث المسرحي. من مكتبة الفنان علي الكسار ؛ 22)

تدمك 2-822-977-978

1. المسرحيات العربية. 2. الكسار، علي، 1887-1957. أ. مركز توثيق التراث الحضاري والطبيعي (مصر) ب. السلسلة.

2026291850476

ديوي - 892.725

ISBN 978-977-452-822-2

رقم الإيداع: 3885/2026

© مكتبة الإسكندرية، 2026.

الاستغلال التجاري

يحظر إنتاج نسخ متعددة من المواد الواردة في هذا الكتاب، كله أو جزء منه، بغرض التوزيع أو الاستغلال التجاري، إلا بموجب إذن كتابي من مكتبة الإسكندرية. وللحصول على إذن لإعادة إنتاج المواد الواردة في هذا الكتاب، يرجى الاتصال بمكتبة الإسكندرية، ص. ب. 138، الشاطبي 21526، الإسكندرية، مصر.

البريد الإلكتروني: secretariat@bibalex.org

طبع في مصر

المحتويات

٧ تقديم
٩ الرائد الموهوب
١١ علي الكسار.. نبذة عن مسيرته الفنية
١٣ عن الرواية
١٥ شخصيات الرواية
١٩ الفصل الأول
٤٣ الفصل الثاني
٦٥ الفصل الثالث

تقديم

يُعد المسرح من أهم وسائل الاتصال الجماهيري لدى الشعوب؛ فهو يوثق واقع المجتمعات، ويمس وجدانها، ويؤكد على المبادئ التي تحتل على قيم المواطنة وقبول الآخر مهما اختلف جنسه أو عرقه أو دينه.

ولمصر مع المسرح أبو الفنون تاريخ طويل تمتد جذوره إلى بدايات المسرح الأولى، سواء أكان ارتجالياً حكاياً أم مبنياً على تقنية خيال الظل التي كانت تُصنع شخوصها من الورق المقوّى أو الجلد أو العرائس المتحركة.

ومع قدوم الحملة الفرنسية إلى مصر عام ١٧٩٨ عرفت مصر المسرح بصورته الحديثة، فتكونت فرقة "الكوميدي فرانسيز". وفي عام ١٨٦٩ شيد الخديوي إسماعيل المسرح الكوميدي الفرنسي ودار الأوبرا وأعدهما لاستقبال الوفود المشتركة في الاحتفالات الأسطورية التي أقامها لضيوفه بمناسبة افتتاح قناة السويس، كما أنشأ الخديوي في تلك الفترة مسرحاً آخر في الطرف الجنوبي من حديقة الأزبكية المطل على ميدان العتبة عام ١٨٧٠، وعلى هذا المسرح ولد أول مسرح وطني بريادة يعقوب صنوع وأبو خليل القباني وإسكندر فرح.

ومع بدايات القرن العشرين انتعشت حركة الفنون المسرحية في مصر، فكان المسرح الغنائي بعروضه الغنائية لسلامة حجازي وسيد درويش، والمسرح الدرامي لجورج أبيض ويوسف وهبي، وازدهر المسرح الكوميدي بصورة كبيرة، وحققت الفرق الكوميدية نجاحاً هائلاً خاصة فرقتي علي الكسار ونجيب الريحاني.



وحرصًا من مكتبة الإسكندرية على الاهتمام بالتراث الإنساني وتوثيقه في المقام الأول وتعريف الأجيال المتعاقبة بالتراث وتناقله؛ قام مركز توثيق التراث الحضاري والطبيعي، أحد مراكز قطاع التواصل الثقافي بالمكتبة، بتوثيق الأعمال المسرحية في فترة العشرينيات وحتى الأربعينيات من القرن الماضي لأحد أهم رواد المسرح المصري الفنان الكبير علي الكسار (١٨٨٧-١٩٥٧)، الذي اشتهر بشخصية (عثمان عبد الباسط) النوبي. والذي قدّم ما يزيد على ١٠٠ عرض مسرحي، وعددًا من الأفلام السينمائية الناجحة التي لا تزال عالقة في الوجدان المصري والعربي.

وحرصت مكتبة الإسكندرية على عرض الأعمال المسرحية للفنان القدير كما جاءت في نصها الأصلي؛ حتى نحفظها أولًا من الاندثار، ونتيح للقارئ والباحث المتخصص التعرف على الحياة الثقافية والاجتماعية والسياسية لمصر في تلك الفترة المهمة من تاريخها، ومفردات اللغة المستخدمة في تلك العقود. وما كان لهذا التوثيق الرقمي (المشروع القومي لتوثيق التراث المسرحي- من مكتبة الفنان علي الكسار- رواية الوارث ١٩٢٦م وهي الرواية رقم ٢٦ حسب الترتيب الزمني لإنتاجها ضمن المجموعة التي تم توثيقها من مكتبته) أن يظهر للنور إلا بالتعاون الوثيق مع الأستاذ ماجد علي الكسار نجل الفنان علي الكسار.

وختامًا أمل أن تأخذنا هذه الرواية، التي أقدم لها، في رحلة تواصل بين الماضي والحاضر؛ لإحياء التراث الثقافي والتذوق الفني، ودعوة أيضًا لمواصلة مسيرة التوثيق في هذا التراث الإبداعي الخالد.

أ. د. أحمد زايد

مدير مكتبة الإسكندرية



الرائد الموهوب

يمثل الفنان الكبير علي الكسار «١٨٨٧-١٩٥٧» علامة بارزة في تاريخ المسرح المصري الحديث، فعبر نصف قرن من العمل الجاد، منذ تأسيس فرقته المسرحية الأولى «دار التمثيل الزينبي»، ١٩٠٧، أسهم الرجل في الحركة المسرحية، ثم جمع بين المسرح والسينما، وكان تنافسه الشرس مع نجيب الريحاني، في عشرينيات وثلاثينيات القرن العشرين، أداة مهمة في إنعاش المسرح ورواجه.

إذا كان الريحاني قد ابتكر شخصية كشكش بك، العمدة الريفي الساذج الذي يقع ضحية سهلة لناهبيه وسارقي أمواله، فإن علي الكسار يقتزن بشخصية عثمان عبدالباسط، النووي الطيب العفوي البريء كطفل.

كان علي الكسار رائدًا بحق في ساحة المسرح الارتجالي الذي لا يتقيد بالنص المكتوب، ويتواصل مع جمهور الصالة في إطار خلاب من العفوية والتقارب الحميم، لكن مشكلة الرائد الموهوب تتمثل في غياب القدرة على الخروج من الإطار الذي لا بد أنه يضيق ويعجز عن مواكبة متغيرات العصر وتطوره. وقد انتقل الكسار بشخصيته المسرحية إلى السينما، فقدم أفلامًا ناجحة جماهيريًا بقدر ما أنها لا تملك مؤهلات البقاء والاستمرار.



لينتهي الحال بإغلاق مسرحه بالقاهرة بعد أن قدّم ما يزيد عن ١٦٠ عرضاً مسرحياً، بالإضافة إلى العديد من الأفلام الناجحة. ويُسدل ستار حياته في مستشفى القصر العيني عن عمر يناهز الـ ٦٩ عامًا بعد معاناة من الفقر والمرض.

وختمًا فإن المشروع الذي يتبناه «مركز توثيق التراث الحضاري والطبيعي» جدير بالاحترام والتقدير والاهتمام، ذلك أنه يتيح للقارئ والباحث فرصة معرفة صفحات بالغة الأهمية في تاريخ الفن المصري، ومن خلالها تطل شهادة صادقة عن المجتمع، سياسيًا واقتصاديًا وثقافيًا، في صعوده وهبوطه وازدهاره وانكساره.

مصطفى بيومي

ناقد وروائي مسرحي



علي الكسار .. نبذة عن مسيرته الفنية

[illegible]

في ثلاثين سنة لا تتجاوز مع مدينة الدربيك فوجيته يؤجرها إلى فرد اجنيه
 فاستأجرت وبيع لبيع ملكه وملكته به شهرين مارس وجرى في ١٧ وأخضع به
 وروايت : كما بدأ كانه - حقه ليه - خلى أبك - لونه وونه ججهه تأليفه وأخرج
 ثم تمت به طيبه إلى الوجهه القبل والجري استقرقه شهر طير ١٩٤٧ ومضيف
 روجه المزعج يبيع كاذبه للاسه في المنة ٥٥ طير لا الامنة ٩٤٧ وكذا نقتم
 كل يوم روايت به روايتا لستوة

فذا به امة الشاط ليرى وأما الشاط السيل ما في ملكته في
 نيم : يوم في الطال - اظم ليرى - ورداء - الصيت ولا يقنى شراف
 ١٩٤٧

و ١٩٤٧ ملكة نيم - صاحته ليعاره وما يستبد وكله على الله
 وأما إذا استأجرت من عند المظوم ابن قنكر من ذكته فأذكر لكم :
 بواب الصاره - اجنيه - غفيرة الدركه - اللقران - شناه ولى
 ١٩٤٧ - ٧ - لغنى ٢ اجنيه - يوم - موطع البشير - الخليل - كلابا
 ولصيه حراي - نور الديره والجاره الكارة - رصاصة في العقب - وغضا ...
 ولوانى وجبت ليرى الذي فضل به طراشيه عند لعل باسترا طوال شهر
 الموسم الثرى وكذا ؟

ومنه في انظار المرمم الصينه من العلم وعلى الله الاتكال
 والعلم عليكم روعة الادب كاته ؟ على الكار

١٩٤٨ فبراير

عن الرواية

فرقة علي الكسار

تأليف أمين صدقي^(١)

عدد الفصول ٣

تياترو ماجستيك

** مُثلت هذه الرواية مرات عديدة، وغاية تمثيلها كان يوم الأربعاء والخميس والجمعة ١،٢،٣

يناير ١٩٢٢م بمصر بتياترو الماجستيك^(٢)

(١) ماجد الكسار، علي الكسار في زمن عماد الدين، مهرجان القراءة للجميع، مكتبة الأسرة، سلسلة الأعمال الخاصة (د.م.: الهيئة المصرية العامة للكتاب، ٢٠٠٣).
(٢) أنظر ص٨٤.



الممثلين المشاركين بالرواية

محمد سعيد	سعيد بيه
خضرة	الحال
محمد النجيد	عم عثمان
ضم	القرية
التمه	سعيد بيه
الحناط وال	
محمد سعيد	سعيد بيه
خضرة	الحال
عبد الحميد	عم عثمان
القرية	ضم
سعيد بيه	التمه
بيادى	الدكتور
زينة	الزوم
سكى	ام احمد

شخصيات الرواية حسب ظهورها

أم أحمد	زوجة عثمان
روزة الخياطة	تطالب سعيد بدفع ثمن البنوار
عثمان	خادم سعيد وزوج أم أحمد
سعيد	سيد عثمان
العمدة	عم سعيد
إدريس عبد الباسط	خال عثمان
الشيخ عبد الباسط	عم عثمان
الدكتور	يكشف على أم أحمد
الداية	تساعدهم في العثور على الأطفال
أضم أغا	الأرنائوطي والد البنت
الزوجة	زوجة سعيد





علي الكسار

القص الاول
روايه بشار السعد
(فتح النار عن اللحنه الافتتاحي)

ام احمد به جافكو موس . دول دوستونا و غولونا البيت بفر

يقلب كك ليه . زي اللحنه عابسيه في مرشان

الخياط نهال ك سيد يا خالتي ام احمد

ام احمد به . الت روزه الخياط

الخياط ابو . سيدك فيه مال

ام احمد به . عازم منه ايه ياد لعدى

الخياط ابو هو كان جالى منه شهر ووصافى على البنواره
لواحت ش كاث وياه ومنه نزل رطل ما شفقو شه

ام احمد معلمه يا فتى . بس حاكم المالكه خمه شويه مع سيدى

اليوميه دول

الفصل الأول

تفتح الستار عن اللحن الافتتاحي.

لحن المتريسات

تعالوا بنا يا مزمزلات نتنطط ونغني
دا البيه بتاعنا لازم قاعد هنا مستني
تعالوا نخش نلاعبه ونبلفه ونداعبه
من راسه لغاية كعبه ونقشطه بلطافه وتأي
فين متريسات زيّنا احنا ياما هيّصنا ياما اتبجحنا
من يوم ما القطن وقف سوقه واحنا يا كبدي ما استفتحنا
وراح فين دا يا سعيد بيه
ماهوش هنا يادلعدي..
يُه دي أم أحمد ياختي قطيعه هس بقى لا ترازينا
دي أم أحمد مش روزينا لَحسن بَعدين تقوم علينا
تبهدلنا وتأذينا

رجال	مرحوب يا غايس
ستات	ييه دول إييه
رجال	إحنا يا هانم محاسيب البيه جايّين له يفوت لنا حاجة
	وطول ماهو غني إحنا في رجليه
	إحنا يا مدام سوسته الوارثين بايعين جتنا ومقايسين
	أكلين لابسين حامدين شاكرين والله يحب المفلسين
بنات	سامعين بيقولوا إيه يا أمينة دا الحال من بعضه والله ياخينا
	ماحنا زيّكوا سوقنا نايم وحالتنا عقبال الاليم
رجال	إنتويا نسوان الحاتباتا مطرح ما تمشوا سوقكوا مليح



ودائماً في حظ وتفريح	تلاقوا بدال اللطخ تلاته	
فين هو الحظ فين التفريح	داحنا يا كبدي زي الأسرى	بنات
وشنا يضحك والقلب جريح	طول عمرنا كده نبقي يا حسره	
ياما بنشوف ونقاسي	داحنا ماتأخذنيش	
ياهو ولا حدش راسي	أتعس منا احنا مافي شي	
بالذمه هل يرضيكم	طب عالفلسفه دي	رجال
يا زكيه وحب يتاويكم	لوجالكوا راجل	
وميت ياريت	ياريت يا سيدي	بنات
وبقت ستات عال في بيوتها	ياما فيه نسوان كداهه تابت	
ولو ماتلقاش غير قوتها	ماتبعش عفافها ياسي ثابت	
لكل شيء أساس	دا شيء صحيح يا ناس	فتحية
من طولها لعرضاها	أسعد مره في الدنيا دي	
لغاية كبرها	اللي من صغرها	
وتصون عرضها	تعرف تحفض ^(١) شرفها	

أم أحمد : يُه جاتكو حوسه. دول دوشونا وخلصونا البيت يضرب بقلب كده ليه. زي اللي
احنا عايشين في مورستان

الخيطة : نهارك سعيد يا خالتي أم أحمد

أم أحمد : يُه. الست روزه الخيطة

الخيطة : أيوه. سيدك فين أمال

أم أحمد : ليه. عاوزه منه إيه يادلعدى

الخيطة : لا بس هو كان جالي من شهر ووصاني على البنوار^(٢) ده. لواحد ست كانت
وباه ومن نهارها ماشفتوش

أم أحمد : معلش ياختي. بس حاكم الماليه مخسعه شويه مع سيدي اليومين دول

(١) المقصود "تحفظ".

(٢) كلمة باللغة الفرنسية "Peignoir" وتعني: رداء الحمام.



- الخيطة :** طيب هو فين سيدك^(١) علشان آخذ منه ثمن البنوار وحساب الشهر اللي فات
- أم أحمد :** كبدي علينا. إنت زعلانه على حساب الشهر اللي فات؟ أmaal نقول إيه أنا وجوزي. اللي لنا عنده حساب الست اشهر المتأخرين
- الخيطة :** يا سلام ست اشهر
- أم أحمد :** آه وحياتك. وخد لبتي ومبارمي^(٢). ما اعرف رهنهم والا باعهم والا عمل فيهم إيه. واديني جيله على وش ولاده ومحتاره اعمل إيه
- الخيطة :** وازاي ساكتين على كده
- أم أحمد :** أهه ياختي كل ما اتكلم. يوعدنا إنه لما يموت عمه ويورث. يخلصنا بالفلوس اللي عليه. وكتب كمبياله لجوزي عثمان بتلتمية جنيه قال يبقى يديهم له بعد موت عمه
- الخيطة :** غريبه دي. أmaal بيصرف منين بس
- أم أحمد :** لا ماهو عمه اللي باقول لك عليه ده. اللي هو مستنيه لما يموت ويورث فيه. اسمه زعرب بيه. عمده في بلد نواحي بني سويف دي اللي جنب قليبوب
- الخيطة :** جنب قليبوب؟ جنب قليبوب إيه يا وليه. دي بني سويف قبلي ودي بحري
- أم أحمد :** يا لهوي. إنت حاتسكي لي ع الواحده والا إيه. لاهو أنا قالوا لك عليّ إني باعرف كوزموجرافيه دي والا اسمها إيه
- الخيطة :** كلام إيه ده. كوزموجرافية إيه وفوتوجرافية إيه. إنت بتلخبطي كده ليه
- أم أحمد :** الغايه أهه عمه ده اللي باقولك عليه. بيعت له كل شهر زي تلاتين جنيه. ومفهمه إنه متجوز ومستقيم وماشي في حاله. وبس الماهيه بتاعته مابتكفّش مصاريف البيت إلا بالزور
- الخيطة :** متجوز؟ أmaal فين الست بتاعته
- أم أحمد :** الست بتاعته أهه ضحك عليها وسفّرها على إسكندرية عند أهلها. قال تغيّر هوا. بعد يا قلبي ما باع صيغتها ونجرها خالص. وكل دا علشان يدور على حل شعره
- الخيطة :** يا سلام. الغايه اسمعي. خدي البنوار أهه. ولما يجي ابقى إديه له وفهميه إني حاجي له بعد يوم والا اتنين (تخرج)

(١) تم حذفها.

(٢) يُقصد بها الخلي النسائية بالرقبة واليدين.



- أم أحمد : على عيني
 الخياطة : أورقوار^(١)
 أم أحمد : أورقوار عليك^(٢) يا ست روزه. والله طيب على سيدي ده اللي بقى منتتش
 من كل جهه
 عثمان : وليه يا أم أحمد. هي راحت فين الحرمة دي
 أم أحمد : يه إنت جيت
 عثمان : إيه الزيته اللي كانت هنا دلوقت دي
 أم أحمد : زيتيه؟
 عثمان : أيوه الراجل عم مرغني البواب بتاع الجيران. بيقول لي إن كان فيه هنا رقص
 وطبل ومغنى. إيه العباره. إنتِ فتحتي البيت إلدورادو^(٣) والا إيه
 أم أحمد : آه. لا يادلعدى. دول بعيد عنك المتريسات بتوع سيدي. جم زي العاده
 عثمان : والله طيب. وهو راح فين. أظن خرج يدور له على سلفيه كمان على موت عمه
 أم أحمد : أهه خرج من الصبح ولسه ماجاش. لكن تعال قول لي إنت كنت فين
 عثمان : كنت في البوسطه. نرمي جواب للراجل عمي يمكن يحس على دمه شويه
 ويبيعت لنا قرشين نتفك فيهم
 أم أحمد : عمك اللي في كوم أمبو
 عثمان : وهو أنا عندي عم غيره
 أم أحمد : وقلت له إيه في الجواب اللي بعته
 عثمان : أنا فهمته في الجواب. إن أنا عندي محل تجاره كبير وبس مزنوق في بيعه
 كبريت. والفلوس ناقص خمسين جنيه
 أم أحمد : عال. أهه أول ما يجيلك الخمسين جنيه اللي إنت طالبهم من عمك. تجيب
 لي لبتي ومباريمي. وتعرف شغلِك إنت والبيه بتاعك
 عثمان : طيب طولي بالك. ماتقاطعيش أحسن الراجل يعرف مايبعتش
 أم أحمد : مايبعتش ليه. مش بتقول بيحبك ولالوش حد غيرك. ولما يموت إنت اللي حا تورته^(٤)

(١) كلمة باللغة الفرنسية "Au revoir" تعني: إلى اللقاء.

(٢) تم حذفها.

(٣) صالة رقص شهيرة في الألبانية في أواخر القرن التاسع عشر.

(٤) اختصار جملة أم أحمد: مايبعتش ليه. مش بتقول بيحبك.



- عثمان : أيوه. علشان هو كان زعلان مني. لما دري إني أنا اتجوزتك
- أم أحمد : اتجوزتني؟ ليه مش قد المقام
- عثمان : لا. يعني اتجوزت واحده من غير جنسي
- أم أحمد : ياختي اسخِّم بلا وكسه
- عثمان : اخرس وسكه في عينك. إوع تطول لسانك احسن اكسر راسك
- أم أحمد : تستجري تمد إيدك عليّ
- عثمان : استجري؟ ليه من مين ياختي
- أم أحمد : من مين؟ من اللي في بطني بابا
- عثمان : آخ يا ناري. بس إن ماكانش اللي في بطنك
- أم أحمد : {كنت حا تعمل إيه
- عثمان : يا وليّه اختشي تاخر بطنك عني
- أم أحمد : أنا مش حاسييك. أنا عايزاك تسقطني
- عثمان : خليكوا شاهدين. أنا مامدتش إيدي عليها
- أم أحمد : همّ مين اللي شاهدين
- عثمان : يا بنت الناس مافيش لزوم. روعي على بيت ابوك. وانا كل كام يوم ابعثلك
- اللي يقدرني عليه ربنا
- أم أحمد : أmaal بعد ما نجرتني وخذت صيغتي اديتها لسيدك. وتقول لي روعي على
- بيت ابوك. يا حراميه يا نور
- عثمان : يا ستي بس طوّل بالك. هي صيغتك بس. مش بيعني كمان الدكان بتاعي
- أم أحمد : ياختي اوعى كده قطيعه مررتني^(١). من حق خد يادلعدني. تلغراف اهه
- جه لسيدي سعيد بيه من امبارح. وانا نسيت اديه لك علشان تديه له
- عثمان : من امبارح؟ آه. لازم عمه مات. انبسط بكره نجيب لك اللبّه والمبروم بتاعك
- أم أحمد : أيوه كده. كل من كان أولى بحقه
- سعيد : وليّه يا أم أحمد. يا عثمان
- أم أحمد : آه. أهه جه. إدي له التلغراف بَشْرَه علشان نقبض

(١) إختصار الحوار ما بين {...}: أم أحمد: طيب روح روح.



- عثمان** : لا يا وليّه مش دوغري كده. أحسن بعدين من فرحته يجري له حاجه. أنا راح نستخبى جوه ماتجيبش سيره بعدين أنا اعرفه شويه شويه
- سعيد** : هن. وليّه يا أم أحمد. مافيش حد جالي هنا
- أم أحمد** : أهم جوك كثير يا سيدي
- سعيد** : هم مين الي جولي
- أم أحمد** : مين؟ الجماعة الي بيجولك تمّلي من أول الشهر لأول الشهر
- سعيد** : آه. المتريسات بتوعي. الله يجازيك يا أم أحمد ودول خرجوا بقى لهم كثير
- أم أحمد** : من يجي ربع ساعه بس. والدلعدي الست روضة الخياطة كمان جابت لك بنوار. قال وحا تفوت بعد كام يوم علشان تقبض حقه
- سعيد** : خازوق. دانا بقيت عيضة خالص. آه من حق اسمعي
- أم أحمد** : نعم
- سعيد** : خشي قوام نفّضي البيانو الي جوه. أحسن فيه جماعه من بتوع الكانتو والموبيليات دول. جاين يساوموه ويشتروه^(١)
- أم أحمد** : يا لهوي. حا تبيع البيانو
- سعيد** : أيوه. ومش بعيد إن بكره أبيع الحلل رخزين. حاعمل إيه. إذا كانوا التلاتين جنيهه الي بيعتهم لي عمي من البلد دول. مافيهمش بركه
- أم أحمد** : يّه ماهو إنت الي فاتحها كده غالبجري. ومسّرّ مراتك ودائري مع الألايش بتوعك دول
- سعيد** : طيب بس بلاش غلبه. خشي اعلمي الي باقولك عليه
- أم أحمد** : أنا مالي. أنا ابعت له الراجل يعرف شغله وباه (تخرج)
- سعيد** : أما يعني إذا كان الحال حا يستمر على كده. الأحسن إني أطفش من مصر. من الديّانه دول الي دايمًا قدام عيني كده زي خيال أبو هملت. والأدهي لو دري عمي بالحكاية دي. خصوصًا بعد ما فهمته إني متجاوز من يجي سنه دلوقت وماشي مستقيم. أصبر أما اعمل كشف أحصر فيه كل الديون الي عليّ أما اشوف (يجلس)
- عثمان** : أيوه لما نفهمه شويه شويه راح ينسط سلام عليكم

(١) اختصار جملة سعيد: خشي قوام نفّضي البيانو الي جوه. أحسن فيه جماعه من بتوع الكانتو جاين يشتروه.



سعيد	: إيه ده عثمان
عثمان	: أيوه عثمان
سعيد	: أنا مش قايلك ألف مره ماتخشش عليّ قبل ما تخط عالباب
عثمان	: مانخشش عليك قبل ما نخط عالباب
سعيد	: أيوه
عثمان	: ليه نايم وعايز نصحك. داخل عليك في الحمام وانت عريان ^(١)
سعيد	: هس بقى بلاش فلسفه. دي أصول يا غبي. تاني مره تبقى تخط ولما اقول لك خش تنك داخل
عثمان	: وإذا ماقلتليش خش
سعيد	: دهدي. إذا ماقلتش خش ماتخشش. إنت تقعد ساعه عالباب. سامع
عثمان	: سامع يا سيدي ^(٢)
سعيد	: دلوقت قول لي عايز إيه
عثمان	: لا أنا بس جاي افكرك بالكيمباله بتاعي والست اشهر
سعيد	: يا سلام يا أخي عليك وعلى أفكارك. وانا مش عارف الي عليّ لما جاي حضرتك تفكرني
عثمان	: لا بس
سعيد	: مابشش ولا كلام فارغ. إنت مش معاك كيمباله بالمبلغ بتاعك
عثمان	: أيوه عندي كيمباله مكتوب فيها لما يموت عمك آخذ فلوسي
سعيد	: آه يا عم عثمان. إذا مات عمي وورثت أنا ابسطك خالص
عثمان	: يعني تخلصني بالتلمية جنيه بتوعي
سعيد	: موش بس أخلصك. أعطيك التلمية جنيه وتلمية جنيه فوقهم كمان. لأنه راجل بخيل ولا بهونش عليه بيعت لي غير الثلاثين جنيه الي مابتكفينش غير ثلاث اربع تيام زي ما إنت شايف
عثمان	: طيب والي يجيب لك خبر عمك تدي له إيه؟
سعيد	: أدّي له؟ أدّي له ألف جنيه
عثمان	: {استنى

(١) تغيير جملة عثمان: ليه داخل عليك وراسك عريانه. داخل عليك في بيت الراحه.

(٢) تغيير جملة عثمان: يعني حاخش إيه حاخش عند الحاتي.



- سعيد** : استنى إيه
- عثمان** : استنى طول بالك. نجيب لك خبر عمك حالاً. هو راح فين
- سعيد** : غريبه. إنت اتجنتت يا راجل والا إيه
- عثمان** : يا سيدي بس طول بالك. دانت راح تنبسط خالص. اتفضل. آدي خبر عمك أهه
- سعيد** : إيه تلغراف وريني فيه إيه^(١). حاضر باكر الساعه تلاته بعد الظهر. عمك. ديهدي دا التلغراف ده من امبارح
- عثمان** : أيوه لازم هو مات من امبارح
- سعيد** : مات إيه يا أخينا. دا عمي باعت لي تلغراف بيقول فيه إنه حاضر النهارده الساعه تلاته بعد الظهر يعني دلوقت
- عثمان** : بقى ماماتش
- سعيد** : لا يا سيدي ماماتش
- عثمان** : إخص عليه وعلى شرفه
- أم أحمد** : (داخله) هي. فهمته
- عثمان** : يا ستي اتلهي
- أم أحمد** : البركه فيك يا سيدي. كلنا لها آدي حال الدنيا. الحمد لله اللي ربنا طمنك على ميراثك. أيوه كده. علشان تتبحج وتفك عن نفسك
- سعيد** : إيه دي بتخرف بتقول إيه
- عثمان** : مغفله^(٢) فاكده إن عمك مات
- أم أحمد** : يا ندامه ليه هو ماماتش
- عثمان** : لا ياختي استأنف
- أم أحمد** : أبداً. شوف لك طريقه وموَّته. أنا عايزه لبتى ومباريمي

(١) تغيير الحوار ما بين {..}: عثمان: ألف جنيه؟

سعيد: أيوه

عثمان: دنا اجيب لك خبر أبو عمك كمان.. ألف جنيه. دنا اجيب خبرك إنت..

خبر عمك

سعيد: إيه تلغراف

عثمان: آخر ساعة خبر عمك.

(٢) تغيرت: مسكينه.



(موسيقى ١)

- عثمان : وانا التلمية جنية بتوعي (جرس) آه إيه ده
سعيد : روح اجري شوف مين. الله يلعن تغفيلك يا عثمان قال بيديني تلغراف
تاريخه امبارح قال. هن مين
عثمان : إلحق يا سيدي دول الولاد أولاد أصحاب البيت جاينين يطالبوك بالأجره
المتأخره عليك
سعيد : خازوق وأنا حاديههم منين خليههم يخشوا

لحن أجرة البيت

يا بيه دا حرام اتلوعنا	ودخنا ودابت رجلينا
ليه بتخلف وعودك معنا	وليه يا بيه تاكل الأجره علينا
جيبوا وكيلكم هنا يحاسبني	وكيلنا إيه من غيرك واكلنا
"ساكن في بيتنا ازاي وناهبنا	ليه إنت تفضل كده تماطلنا" ^(١)
حرام يا بيه ظالمنا ليه	ليه المراوغه قول قصدك إيه
روحوا اشتكوني روحوا اتهموني	إيه اللي يخرج من كوعكو إيه
{شاهدين شاهدين	لازم نعرزلك
نفضل نرذلك	واذا اتعوجت برضه مسيرنا نعدلك
حانفضل نسرعك	ونــــرازي مخك
وان خدت عزالك	روح الله لا يرجعك" ^(٢)
يا ولاد سيبوننا في همنا	جيتوا عكرتوا دمنا
تقولم تعيدم تَدْنُوهاها	أنا متلحم لكم هنا
آدحنا يوممي كده في نقير	وكل يوم نبعث إنذار
لا ذوق بينفج ولا تفجير	الحق دا ياهو مافيهش هزار

(١) حذف البيت.

(٢) حذف الأبيات ما بين {...}.



سعيد ماتتعبوش نفسكم البيت دا بتاعي أنا همضي المده
الأولاد يا سيدنا عيب ليه بتكلمنا بالتحمه دي وبالبرود ده
سعيد روحم بقى بلا هلوسه حسابكم دا شيء اتنسى
الأولاد إزاي إزاي..

الي يكون عنده نخوه زي نخوتنا يا بيه
يستحيل ينسى حقوقه واللي له واللي عليه

عثمان : (داخلاً) قبضم
سعيد : قبضوا إيه وزفتوا إيه
عثمان : استنى أما نسك الباب ليجي بتاع العيش لآخر
سعيد : خازوق. دنا صحيح مافتش خالص. تعالى إحنا مش في كده. دلوقت لو جه عمي
حاعمل ازاي

عثمان : تعمل ازاي. اعمل زي الناس
سعيد : يا سيدي بس بلا كلام فارغ خلينا في الجد
عثمان : ودا مش جد. تعمل إيه. قول له موت خلي الناس تاخد حقوقها
سعيد : ماهو الخازوق إن عمي عارف إن أنا متجوز وماشي مستقيم. وإذا جه ولا
التقاش مراتي هنا. حا يفهم إني ماشي هلس. ويمكن بالسبب ده يحرمني
من ميراثه

عثمان : خازوق وتروح فلوسي
سعيد : بالطبع
عثمان : وإيه الرأي دلوقت . ما تبعت تلغراف تجيب مراتك^(١)
سعيد : يا سلام عليك يا أخي وعلى أفكارك. باقول لك جاي دلوقت حالاً. لأن
التلغراف ده تاريخه امبارح (جرس)

عثمان
وسعيد : إخ. اتلبحنا
سعيد : روح شوف مين لازم هو

(١) تغيير جملة عثمان: طيب ما تبعت جواب تجيب مراتك من اسكندرية.



- عثمان : روح إنت لازم هو
- سعيد : يا أخي روح شوف باقول لك
- عثمان : آديني رايح^(١)
- سعيد : آه يا ربي اعمل ازاى دلوقت. أقول له إيه بس
- أم أحمد : (داخله) تقول له إيه. إديله التلتميت جنيه واللبه والمباريم بتوعي
- سعيد : يا ستي إحنا في إيه والا في إيه
- (عثمان داخلاً يضحك)^(٢)
- سعيد
- وأم أحمد : إيه فيه إيه
- عثمان : (يضحك) قال كنا خايفين قال
- سعيد
- وأم أحمد : فيه إيه موش تتكلم
- عثمان : ولد صغير ضرب جرس الباب وجري
- سعيد : أعوذ بالله (يقع على كرسي)
- أم أحمد : يه. هو جرى له إيه. إلحق يا عثمان إلحق
- عثمان : إخ. دا باين هو الي حا يموت وتروح فلوسي
- أم أحمد : يا ندامه ولبتي ومباريبي
- عثمان : هوّي يا وليه^(٣)
- سعيد : آه أنا فين
- عثمان : الحمد لله. أنا كنت حا امزع الكمبياله
- سعيد : آه يا عم عثمان. أهه دلوقت مافيش حل غير كونك تروح تدبّق لي على واحد من المتريسات بتوعي حالاً. علشان اقدمها لعمي بصفة مراتي
- عثمان : ليه هو عمك مايعرفش مراتك
- سعيد : لا ماشفهاش أبداً. ياللا روح اتدبّق لي على واحد

(١) تغيير جملة عثمان: يا سيدي عمك إنت. واخذ عليك روح إنت.

(٢) حذف دخول عثمان.

(٣) حذف جملة عثمان.



- عثمان : لا يا سيدي أنا بطلت التدابيق من زمان^(١)
- سعيد : اعمل معروف علشان خاطري. اتدبق لي على أي واحد والسلام
- عثمان : يا راجل اختشي عيب
- أم أحمد : يتدبق لك؟ يقدر وانا اكسر رقبتة. إنت حا تخسر لي الراجل والا إيه
- عثمان : لا ماتخافيش. وانا اتدبق إلا عليك إنت يا مراتي
- سعيد : إعملي معروف يا أم أحمد علشان خاطري. أحسن عمي زمانه جاي
- أم أحمد : أبداً يا ندامه تعرف شغلك (جرس)
- سعيد : آه. دا لازم هو. روح يا سيدي شوف مين روح
- عثمان : {يا شيخ ماتخافش دول العيال (جرس) آخ يا ولاد المركوب}^(٢) طيب استنى
أما نأخذ الملقشه وافتح الباب بشويش. والولد اللي نلتقيه في الباب نروح
مدّيله على راسه (يخرج)
- سعيد : أعمل ازاي ياهو. الراجل فاهم إني متجوز. وحاجيب له زوجه من أنهي
داهيه دلوقت
- أم أحمد : يمكن مش هو يا سيدي
- سعيد : إصبري كده اما اشوف ربنا يسمع منك
- أم أحمد : ياختي اما ادخل البنوار دا جوة. صحيح قال لبس البوصه تبقى عروسه
- سعيد : تبقى عروسه. آه اصبري اصبري يا وليه. إلبي البنوار ده كده
- أم أحمد : ألبسه
- سعيد : بس إلبي قوام أحسن عندي فكره. ياللا إلبي
- أم أحمد : فكرة إيه يه
- سعيد : دلوقت افهمك. بس خشي على جوه اتخططي كده وحطي شوية احمر
وابيض^(٣) وتعاليلي
- أم أحمد : يا لهوي الراجل بيقول إيه. أحمر وابيض إيه

(١) تغيير جملة عثمان: أتدبق لك. إخص عليك وعلى كلامك الفارغ.
(٢) تغيير الحوار ما بين {..}: عثمان: يا ولد التوبه دي إذا إيدي مسكتك راح نصفصك
سعيد: روح شوف مين يا عثمان
عثمان: دا الولد ابن الجيران أنا عارفه.
(٣) تغيير "كده وحطي شوية احمر وابيض": وتحمري.



سعيد : أخ، أهم جايين. تعالي بس تعالي أنا افهمك جوه. يا ساتر استر يا رب (يدخلون)

العمدة : إنت مجنون لما تضربني بالمقشه على راسي. يا بربري يا زربون إنت
عثمان : إخرس زربون في عينك. إنت علشان إيه ما تموتش علشان آخذ فلوسي^(١)
العمدة : أنا عاوز اشوف ابن اخويا اللي حاويك يا اسود الوش. قولي هو فين سيدك
عثمان : إخرس سيدك إنت. أنا سيدي ربنا

العمدة : يا باني، إنت مش خدام هنا
عثمان : لا مش خدام هنا
العمدة : أمال إنت قاعد هنا ليه
عثمان : قاعد هنا لحد ما تموت إنت واقبض وامشي
العمدة : أموت؟ أموت إيه يا بربري يا جربوع إنت
سعيد : (داخلاً) الله إيه. فيه إيه

العمدة : إزاي خدامك ده يضربني بالمقشه على راسي
سعيد : إزاي ده يا عثمان مش عيب تضربه بالمقشه
عثمان : أنا مالي. أنا جيت نفتح الباب فاكر إن الولد اللي ضرب الجرس أول مره. ضربت بالمقشه جت على راسه. يعني إيه راسك راس البر (يخرج)
العمدة : هو بيغلط بيقول إيه ده. قسماً وبالله لو كان حدانا في البلد. لكنك قطعت جرتة
سعيد : لا يا عمي ماتاخدش على خاطرك منه دا خدام مجنون
العمدة : هن. فهمني كده. وانت ازاي حالك يا ابن اخويا

سعيد : بخير بحسك
العمدة : أمال فين الست جماعتك اللي اتجوزتها. أظن مختشيه تقابلني
سعيد : لا العفو يا عمي. دلوقت تيجي حالاً. آه أهي جايه اهه. تعالي يا هانم
أم أحمد : (داخله) أهلاً وسهلاً داحنا النهارده زارنا الندي
العمدة : ماشا الله ماشا الله. صلاة النبي أحسن. ما لبت عتقيه مكن
عثمان : (داخلاً) إرمي^(٢)

(١) حذف جملة عثمان.

(٢) تغيرت: الله الله.



- سعيد : يا ساتر يا رب. يا ساتر يا رب
- عثمان : (لسعيد) تعالى هنا فهمني. إيه العبارة. الرجل ده ازاي يطبطب^(١) على مراقي
- سعيد : هس دلوقت أنا في عرضك. أم أحمد دلوقت مش مراتك
- عثمان : إيه^(٢) مش مراقي. أمال مرأة مين
- سعيد : سلفهالي أد نص ساعه بس. علشان اعرف آخد منه قرشين
- عثمان : {وتخلصني بالتلتميت جنبه والست اشهر
- أم أحمد : واللبه والمباريم بتوعي
- سعيد : حاضر على عيني يا روجي
- العمدة : لبة إيه ومباريم إيه
- سعيد : عجبك. لا يا عمي الست لها لبه ومباريم بتوعها عند الصايغ. عايزه تبعت عم عثمان يروح يجيبهم لها
- العمدة : وليه ما يروحش يجيبهم لها. إنتو مدلعينه كده ليه. فز هات لها اللبه جاك لبّه
- أم أحمد : بعد الشر إنشالله العدوين. ماتدعش عليه تف من بقك يا عمي
- العمدة : أي. يعني صعبان عليك اسود الوش ده
- أم أحمد : صعبان علىّ. جوزي
- العمدة : جوزها مين
- سعيد : يا ستي اسكتي. لا يا عمي دي قصدها تقول على جوز الأساور بتاعها
- العمدة : إي. قلت لي^(٣). والهانم بتاعتك بدستور اسمها إيه
- سعيد : الهانم اسمها..
- عثمان : اسمها أم أحمد هانم
- سعيد : هس يا اخينا. اسمها فريدة هانم يا عمي
- أم أحمد : أيوه اسم حلو خفافي
- العمدة : عاشت الأسامي يا هانم. وحضرة أبو جنباك مش من أرباب الأطيان
- أم أحمد : آه. أبويا من أرباب الأطيان

(١) تغيرت: يعبط.

(٢) تم حذفها.

(٣) حذف الحوار ما بين {...}.



- عثمان : أيوه أبوها من أرباب الأطيان. لكن هي من أرباب السوابق
- العمدة : إيه بيقول إيه ده^(١)
- سعيد : يادي الداهيه. روح امشي هات لنا القهوه قوام ياللا يا أخي. إف إيه ده (يدفعه)
- العمدة : دا الخدام بتاعكو دا باينه على نياته
- أم أحمد : أيوه على نياته قوي
- سعيد : ما تدلوش وشك. إذيله قفاك. أحسن خلقتك ذكر خالص
- أم أحمد : نعم بتقول إيه يادلعيدي. مش أحلى من عمك ده الي زي أبو جلمبو
- العمدة : إيه هو. جرى إيه
- سعيد : لا لا مافيش. بس الست كانت زعلانه مني شويه من امبارح
- العمدة : زعلانه منك. مش عيب يا ابن اخويا. ياللا صالحها وبوس راسها قدامي
- سعيد : أبوس راسها
- أم أحمد : يبوس راسي
- العمدة : أيوه. تزعل جماعتك ازاي يا جدع. ما دمت أنا هنا لازم اكون محضر خير.
- ياللا بوس واشبع بوس. إنت حا تختشي من جماعتك
- عثمان : (داخلاً) (يرمي الصينية على الأرض عندما يراهم) الله الله
- الجميع : إيه ده
- عثمان : {يخرب بيتكم}
- أم أحمد : يادي الحوسه
- عثمان : تعالى هنا^(٢) البوس ده ماكانش في الاتفاق يا سيدي
- سعيد : بس هس بعدين اقول لك
- العمدة : إيه. جرى له إيه خدامكم ده
- سعيد : لا مافيش مافيش
- أم أحمد : دا عبيط ماتاخدش بالك منه
- عثمان : والله طيب

(١) حذف جملة العمدة.

(٢) حذف الحوار ما بين {...}.



- العمدة** : يا سنه ندا يا ولاد. يا فرحتك يابو زعرب يا ابن ستيتة
- الجميع** : إيه جرى إيه
- العمدة** : يا صلاة النبي يا صلاة النبي. دا اتاي جماعتك حامل يا ابن اخويا
- عثمان** : إخ. الراجل خد باله من بطنها^(١)
- سعيد** : طول بالك يا أخی
- العمدة** : ياه يا عين النمس إنت. قوام لحقت تولف وتخلف. لا والله ألا ميت براوه عليك
- عثمان** : براوه على مين يا سيدي
- العمدة** : يا جدع احنا بنتكلم في كون الست حبله.^(٢) موش شغلك إنت
- عثمان** : مش شغلي؟ دا شغلي أنا داهه
- العمدة** : وهي^(٣) الست بدستور. حبله من شهر إيه
- أم أحمد** : والله علمي علمك يادلعددي
- سعيد** : أظن يا سيدي حبله من رمضان
- عثمان** : من رمضان؟ رمضان مين؟ لا يا سيدي. دي حبله من عثمان ماتسمعش كلامه^(٤)
- العمدة** : يا جدع إنت اتجننت والا إيه. بقى إنت حا تعرف أكثر م الأب
- عثمان** : أب. ياخي سيبك م الأب ده. أنا أب جزم
- العمدة** : ياه ياه يا رجاله. طب ندرًا عليّ اليوم الي تولد فيه الست ويطلع ولد. أعمل لك تنازل باسمك عن نص أطياني وأملأكي
- عثمان** : لا يا سيدي. أنا عاوز بنت مش عايز ولد
- العمدة** : هوّ وبعدهالك يعني. إنت بتتحتشر في الحاجات الداخليه دي ليه
- عثمان** : داخلية إيه وخارجية إيه. أنا بصفتي أبو الولد الي جاي ده. لازم^(٥) اتصرف فيه على كيفي
- سعيد**
- وأم أحمد** : يا خبر اسوح

(١) حذف: من بطنها.

(٢) تغيرت: حامل.

(٣) تغيرت: إلا.

(٤) تغيير جملة عثمان: رمضان مين يا سيدي. حبله من عثمان ياخويا.

(٥) تغيرت: أنا حر.



- العمدة** : أبو الولد؟ أبو الولد ازاى. بيقول إيه الراجل ده^(١)
- سعيد** : لا لا هو قصده يقول إنه حا يحبه زي أبوه يعني
- العمدة** : أبوه إيه وجده إيه. دانا طول عمري محروم م الخلفه وبتلقف على حته عيل
- سعيد** : بس على الله ماتجيش بنت لا كل تعبنا يروح فاشوش
- عثمان** : طيب ماعرفتنيش على العبارة دي من الأول ليه
- سعيد** : أعرفك على إيه
- عثمان** : لما إنت عارف إن عمك بيحب الصبيان ماعرفتنيش ليه. كنت عملتلكو صنف دكوره على طول
- العمدة** : أما حقه أنا لسه ماشفتش خدام حشري زي ده
- أم أحمد** : سيبك يا عمي ماتاخدش بالك منه. تعال بنا على جوه اغسل وشك من تراب السفر. إوعى اما اروح اجيب لك شنطتك
- العمدة** : لا لا ارجعي. إوعي تشيلي حاجه ثقيله. اقعدى إنتِ استريحي ولا تتحركيش أبداً. هاتوا كنبه يا جدع كنبه هنا قوام
- عثمان** : كنبه إيه. إحنا بقى عندنا حاجه. ما كله بعناه
- العمدة** : إيه بيقول إيه ده
- سعيد** : لا يا عمي. حاكم البرابره يفتكروا إن الكنبه يعني كرسي الولاده. ماتاخدش على كلامه. آه يا غبي^(٢)
- العمدة** : طيب القصد. خدوا اشتروا كرسي ولاده.. ومرضعه للولد ومرجيحه للولد (يعطي نقود لعثمان)
- عثمان** : مرجيحه للولد. حصان للولد. ميراث للولد. بغغان للولد (يخرج)
- العمدة** : إيه الراجل ده. مهفوف والا إيه. ياللا تعالي يا فريدة هانم. تعالي استريحي في أوضتك أحسن ياللا السلامه (يخرج وأم أحمد)
- أم أحمد** : حاضر يا عمي
- سعيد** : أف. أما الحق أندده لعم عثمان المغفل ده. لا يروح يشتري الحاجه من حق وحقيق. يا عم عثمان. إنت ياسي عثمان
- عثمان** : (داخلاً) مرجيحه للولد حصان للولد

(١) حذف: بيقول إيه الراجل ده.

(٢) حذف: "آه يا غبي".



- سعيد** : حمار
- عثمان** : هو راح فين العمدة
- سعيد** : لا بس دخل جوه ويأ أم أحمد علشان...
- عثمان** : علشان. هي العبارة فيها علشان. {يخرب بيتكم. يا أم أحمد. يا أم ولادي. خليها تطلع هنا
- سعيد** : يا اخي اسمع هنا أُمال
- عثمان** : مش ممكن. دا راجل مجنون. ازاي ياخذ مراقي من قدام عيني^(١)
- سعيد** : يا سيدي طول بالك. آديك شايف إن لحد دلوقت الملعب بتاعنا ماشي كويس. ف لازم تستمر للنهايه. ثم آدي إنت سمعته بيقول إن إذا مراتك جابت ولد يكتب لنا نص ما يملكه
- عثمان** : لكن عمك ده عنده طين كثير
- سعيد** : عنده يجي ألف وتمنيت فدان. يعني حا ناخذ إحنا النص
- عثمان** : يعني على الحساب ده أنا ناخذ^(٢) نص النص. ربعميه وخمسين فدان. والتلتمية جنبه بتوعي والست اشهر واللبه والمباريم دانا حابقي زحمه خالص
- سعيد** : {طيب يا سيدي
- عثمان** : آه. إذا كان كده مافيش مانع^(٣)
- سعيد** : طيب بس اجري دلوقت اخطف رجلك. هات لنا المرجيحه والداية. الي عمي ادالك فلوسهم
- عثمان** : سيبك بلا دايه بلا غيره. دي أم أحمد تولد كده وهي ماشيه زي الخيل^(٤)
- العمدة** : (يكح من الخارج) أيوه
- سعيد** : طيب اسكت احسن عمي جاي أهه. بس اوعى تغلط قدامه بقى. وطول بالك. لأنه غايته ساعه والا ساعه ونص وتنته مسافر^(٥)
- عثمان** : لا سيبك حتى إن ماسافرش أنا اسفرك أبوه كمان

(١) تغيير الحوار ما بين {..}: سعيد: طول بالك

عثمان: يا أم أحمد. يا مراقي. جسمي غل خالص.

(٢) تغيرت: يخلصني.

(٣) حذف الحوار ما بين {..}.

(٤) تغيرت: الفراخ.

(٥) تغيير جملة سعيد: طيب اسكت احسن عمي جاي أهه. وطول بالك وكلها ساعتين ثلاثه ويسافر.



- العمدة** : (داخلًا) أيوه احنا دلوقت عايزين نتغدى. وبعد الغدا ابقى اروح اجيب لكم الحكيم والداية
- عثمان** : دا ناوي يبلط هنا والا إيه
- سعيد** : ألا حضرتك مش ناوي تشرفنا يا عمي. وتقعّد ويانا قد جمعه والا اتنين
- عثمان** : لا هو مسافر علشان عنده شغل
- العمدة** : لأ. آديني مستنظر أما تقوم فريدة هانم من ولادتها بالسلامه. وبعدين اخدكم معايا إنت وهى العزبه علشان تغيروا هوا
- عثمان** : ارحب^(١)
- العمدة** : والله يمكن يلد عليكو هوا الفلاحين تفضلوا قاعدين عندي لحد ما تعملوا ولد تاني
- عثمان** : إيه الكلام الفارغ ده
- العمدة** : عجائب. دا مجنون دا والا إيه
- سعيد** : لا دا بس (لعثمان) يا سيدي
- عثمان** : بس بلا كلام فارغ. إنت قايللي سلفني أم أحمد نص ساعه هنا. مش في الفلاحين
- العمدة** : هو بيرغي بيقول إيه اللوح^(٢) ده
- سعيد** : لا بس بيقول إنه مش واخد على هوا الفلاحين
- العمدة** : لا لا. إنت حا تفضل هنا علشان تخلي بالك من البيت
- عثمان** : أخلى بالي من البيت؟ طيب ومين يخلي باله من أم أحمد ياخويا
- العمدة** : أم أحمد مين (ضحكة)
- سعيد** : الله إيه الهيصه اللي بره دي
- عثمان**
- والعمدة** : إيه العبارة
- العمدة** : أنا داخل اشوف الست أحسن ياللا السلامة (يخرج)
- سعيد** : إيه ده يا عثمان. إنت سبت الباب مفتوح
- عثمان** : أيوه ليه فيه إيه

(١) تغيير جملة "عثمان": سعيد: خازوق.

(٢) تم حذفها.



إدريس	: (داخلًا) فین ابن اختي عثمان عبد الباسط. عثمان (يسلمون)
سعید	: إيه ده. مین دا يا عثمان
عثمان	: دا خالي إدريس عبد الباسط جه من البلد
سعید	: هو هو ^(١)
إدريس	: (مشيرًا على سعید) دوکري مین حضرتہ
عثمان	: حضرتہ حضرتہ. الوکیل بتاعي
سعید	: إيه وکیل
عثمان	: هس سلفني نفسك نص ساعه إنت کمان. مستخدم في المحل التجاري بتاعي
إدريس	: اسمع يا وله يا وکیل. روح انده للولاد بلدياتنا من تحت
سعید	: إيه إيه
عثمان	: لا لا ماعلهش. خلیهم یستنوا تحت احسن الست مراقي بتعمل عملیه صغیره. لكن قولي يا خالي إنت جيت ليه
إدريس	: أنا جيت علشان نبشرك
عثمان	: تبشريني بإيه کمان ^(٢)
إدريس	: الشيخ عبد الباسط عمك. على قد ما كان زعلان منك لكونك اتجوزت واحده بنت بلد. فرح كثير لما سمع إن الست بتاعك حامل وجاي يشوفك إنت والست بتاعك. يعني بعد ساعتين راح يجيلك يسلم عليك وعلى مراتك
عثمان	: خبر اسود ^(٣)
إدريس	: إيه مالك
عثمان	: لا مافيش حاجه يا خالي. الله يبشرك بالخير يا خالي. كان مالك يا عثمان ما كنت خالي
إدريس	: اصبر أما انده على الولاد بلدياتنا من تحت. وله يا مرغني يا سليمان يا عبد الحفيظ (يخرج)
عثمان	: يا حفيظ ^(٤) إيه الرأي دلوقت

(١) حذف جملة سعید.

(٢) تغيير جملة عثمان: خير انشاء الله.

(٣) تغيير جملة عثمان بأداء "السكوت".

(٤) حذف: يا حفيظ.



(موسيقى ١)

سعيد : أنا في عرضك يا عم عثمان. خليك طالع فيها. وقدمني برضه بصفتي الوكيل.
اوعى تنسى عبارة الوكيل

عثمان : الراجل ياخد مني فلوسي ومراقي ويقولني وكيل. حسبنا الله ونعم الوكيل
(ضجة من الداخل ثم يدخل الجميع ويقولون اللحن الختامي)

لحن ختام الفصل الأول

العواف يا سعادة البيه
إننتو إييه؟
إحنا خدامين الحظ
في كل دعه وهيصه
لما سمعنا إن أم أحمد
إلهي تخلف لنا حاجه حلوه
طب اسكتم وبلاش هليله
سيبك وخش لي عشرة بولكه
آدى الجماعه الوزن أهم
ياميت مسا يا بوعفان
مراته حاتخلف ومكشر
دوله الولاد في الدنيا دي
لما تخلف كده وتدادى
الله دا الكلام اللي تمام
داهه الأساس اللي يا ناس
خش يا سمبو قرب جنبه
يا قمر حلفا وكوم أمبو

فتحية

(١) كلمة باللغة الإنجليزية "Six" وتعني: ستة.



العوان يا سادة البعير . به داعمان الله هنا . أنتوايه
 احنا خداميه الحفص وحيثا تباركه ونهني . في كل دعلم وههم
 نهني نجلين ترقص ونهني . لما سمعنا ان ام محمد . راج تولد
 جيتا راي الاس . الدهي تخلف لنا حاجه هلو . ونجب بدل
 البصل كس . طب كنتم وديشه هلاله . يا سادة رسته
 مده راي الليل . سبلك وخشه لي غش بولم . اماك
 يا ام بنا ترقص كك شام بيل . اري الجماعة ^{التورم} ~~الجماعة~~ الله مده
 نجنتا رينا ساقهم . يا صيت ما يا بوغمان . مالك واقف كك
 ليه كمان . جداره حاتخلف وكسر بولم الى اوله بلداوران
 دول الولد في الزياره . زينه حياتنا يا بوسم . لما تخلف كك
 وتندري . تعلق الى منقه كك ذكره . الله را القدام اللقمام
 يا رينتا نقل به يا رينتا . والله لا سبلك الى يا ساس عليه
 بيتي عيلينا . فقه يا سمير قرب صيه . انت فيه يا عثمان
 يا قرحلما وكوم امو يا بلال في زمانه كك اللينا اري الى
 راي انرفش عاك . اري هركك والاطفال . اري عثمانك موشه بطاك
 اري الموطوعم بول . وكلبك سمك الله . يا نجمة سمك الله . اندوكري
 سمك الله . اه يا موشى سمك الله . فيه قطيع دالم شرتونا . داهيا حمتنا
 سته هاله . كان مالك وعاك دول يا عثمان . بس مبه ذلك . لو
 كنت ضربت داهي مبه حنك كان حبه لك سبلك يا شيخم القوم
 واد زله الشوان لازم تقوزم مبه حنك يا عثمان
 قدام الانسان ماقينه ايل حنيه ما دام زو منه حنيه . بفتح مبه مبه ما دام
 راي عيلكم اولاده ديون عرفم ووراده . انقري فوق الحسم والله وحل ديه

كيف الكيف ازاي الحال

زي الزفت عال عال

ازاي حماتك موش بطل

إزاي مراتك والأطفال

إزاي البوظه وعم بلال

وعليك سلمت الله

اندوكري سلمت الله

يه قطيعه والله سرعتونا

كان مالك ومال دول يا عثمان

يا بخيته سلمت الله

آه يا حوستي سلمت الله

داحنا جتتنا مش خالصه

بس مين ذلك

من جنسك كان أحسن لك

وأونطة النسوان

من جنسك يا عثمان

مافيش أبداً جنسيه

يبقم متهنين

ويصون عرضه ووداده

والملة وكل دين

لو كنت خدت واحده

سيبك يا شيخ م الفورمه

لازم تتجوز حرمه

ققدام الإنسانيه

ما دام زوجته بتحبه

ما دام يربي أولاده

أهى دي فوق الجنسيه

ستار



الفضل الثاني

سيد همد . ايه رأيك بفي يا ام احمد . انا عايف لادشوع

في العيان دي

ام احمد لاما تخافش . وهوراج فيه الدلعدي عمك

سيد ما هو كان نايم في اوده الحافيه . هولس ما صميت

ام احمد لاهلث له

سيد وهوراج فيه عم عثمان

ام احمد راج يعمل نوال شهر . با قلب الرامل راج يتجنه

سيد اعلى معروق اشرى عليه يا ام احمد . عشانه نسيك

المعوب على عني . لحد ما يافر

الفصل الثاني

- سعيد** : هن. إيه رأيك بقى يا أم أحمد. أنا خايف لنتوحد في العبارة دي
- أم أحمد** : لا ماتخافش. وهو راح فين الدلعدي عمك
- سعيد** : ماهو كان نايم في أوضة المسافرين. هو لسه ماصحيش
- أم أحمد** : لا هلبت لسه
- سعيد** : وهو راح فين عم عثمان
- أم أحمد** : راح يعمل فنجال قهوه. يا قلبي الراجل راح يتجنن
- سعيد** : إعملي معروف أثري عليه يا أم أحمد. علشان نسبك الملعوب على عمي.
- لحد ما يسافر
- عثمان** : (خبط من الداخل) افتح المفتاح عندك من جوه
- سعيد** : إيه اللي المفتاح عندك من جوه
- أم أحمد** : آه. لازم عمك ساكك عليه الباب من جوه. ومش عارف يفتحه
- عثمان** : (خبط من الداخل) يا سيدي أنا في إيدي صينية القهوه والفناجيل
- سعيد** : يا عثمان. افتح لعمي الباب
- عثمان** : باقول لك يا سيدي أنا في إيدي صينية القهوه والفناجيل
- سعيد** : فناجيل إيه المغفل ده (تقع الفناجيل بالداخل وتتكسر)
- عثمان** : إنت مش شايف. كسّرت الفناجيل^(١)
- العمدة** : اخرس. راجل ماتختشيش. هو فين ابن اخويا اللي مخدمك ده. أنا اخلي
- صباحتيك وصباحيته طين. هو فين ابن اخويا^(٢)
- سعيد** : إيه مالك يا عمي فيه إيه
- العمدة** : فيه إيه إيه. الخدام الكلب^(٣) ده يدلق عليّ القهوه. يغرق الستره والبنطلون
- بتوعك وكمان يقول لي إنت موش شايف. يعني إيه

(١) حذف جملة عثمان.

(٢) حذف: أنا اخلي صباحتيك وصباحيته طين. هو فين ابن اخويا.

(٣) تغيير "الخدام الكلب": الراجل الخدام البربري بتاعكو.



- سعيد**
وأم أحمد : ماعلش يا عمي غصب عنه
العمدة : إخص
عثمان : (داخلاً) إخص راجل مغفل^(١)
سعيد : يا سيدي اعمل معروف بس
عثمان : بس بلا كلام فارغ، إذا كان دا ساكك على نفسه الباب من جوه. ولاهوش عارف يفتح الأوكره بتاع الباب. خرج من جوه زي الحمار.^(٢) راح مكسر الفناجيل. عم إيه ده
سعيد : يا عثمان عيب
عثمان : يا عم ما كلنا لنا أعمام. بقى أنا عمي زي ده. إذا كان عمي زي ده. أنا اخرب بيته كمان^(٣)
العمدة : طب قسمًا وبالله. إن ماكانش علشان خاطر الست حامل. وبدي اظمن عليها. ما كنت استنيت هنا ولا دقيقه. علشان خاطرك يا اسود الوش إنت
عثمان : قسمًا وبالله إن ماكانش علشان خاطر الفلوس بتوعي. واللبه والمبروم بتاع مراقي. أنا كنت نطّل عى أبوك كمان
العمدة : مراته؟ مراته إيه
سعيد : يا سيدي بس اعمل معروف لا تفضحننا
العمدة : مبسوطه من قباجة خدامك دا يا هانم. كده كويس
أم أحمد : ماعلش يا عمي. إمشي روح اعمل فنجال قهوه لعمي
عثمان : عما في عينك
أم أحمد : إلحقوني الراجل حا يسقطني
العمدة : خبر اسوح
سعيد : إنت مجنون يا شيخ إنت
عثمان : إخرس^(٤) إنت مالك مراقي اعرف شغلي فيها

(١) تغيير "راجل مغفل": عليك وعلى دمك.

(٢) حذف: زي الحمار.

(٣) تغيير "أنا اخرب بيته كمان": أنا أوديه الأحداث.

(٤) تم حذفها.



- العمدة** : يا شاويش. يا بوليس. يا خفير. الراجل حا يموت مرات ابن اخويا
- عثمان** : إيش عرفك إنها مراة ابن اخوك (يهجم على العمدة)
- العمدة** : آه يا بربري يا اسود الوش إخص عليك وعلى وقعتك. بس أنا مش فاهم ياهو. إنتو عاجبكم إيه في الخدام ابن الوطي ده
- أم أحمد** : أعمل إيه يا عمي. قسمتي
- العمدة** : قسمتك إيه. أطرديه وانا اجييلك سته لونه وأحسن منه كمان
- أم أحمد** : قال اطردوه قال
- سعيد** : (داخلاً) إف. أعوذ بالله من الخدامين. هن عملتي إيه
- أم أحمد** : حاعمل إيه. ربنا يخلصنا من وقعتك ووقعت عمك السوداء دي
- سعيد** : طب هس هس
- العمدة** : هيه. بتقول إيه الست
- سعيد** : لا لا دي بتقول على عم عثمان
- العمدة** : أيوه هو باين عليه عبيط الخدام ده
- أم أحمد** : إن ماكانش عبيط. ماكانش شبكنا الشبكه المهبه دي. ضبع دكانه وضبع صيغتي
- العمدة** : صيغتك؟
- سعيد** : يا وليه
- العمدة** : صيغتها إيه
- سعيد** : لا دي بتقول على صيغتها الي عند الصايغ. بدها تبعت عم عثمان يجيها لها. لكن احنا مش في كده يا عمي. إنت امبارح كنت بتقول رايح تجيب حكيم. علشان يشوف الست حا تولد إمتى
- العمدة** : أيوه والله فكرتني يا ابن اخويا. بعد ما اشرب القهوة اقوم اغيّر هدومي. وانزل اروح للحكيم. إزعق لنا على عثمان يعمل لي فنجال قهوه
- سعيد** : حاضر.. يا عثمان.. يا عم عثمان
- عثمان** : خلاص أنا مش جاي
- سعيد** : ماعلش تعالى
- العمدة** : أظن واخذ على خاطره. تعالى ماتزعلش. تعالى اعمل لك اشكوزي. علشان خاطر الست



- عثمان** : اشكوزي في عينك. خبر إيه
- العمدة** : خبر إيه إيه؟ يا شيخ خليك راجل طيب. خليك واسع روح اعمل لنا فنجال اسكيتو^(١) روح
- أم أحمد** : أيوه روح ياخويا ماعلش
- سعيد** : خليههم تلاته. علشان أنا راخر لسه ما شربتش
- عثمان** : أما نعمل فيه خازوق يطلع من عينه^(٢)
- سعيد** : إتفضل البس إنت يا عمي. على بال ما عثمان يعمل لنا القهوة
- العمدة** : أيوه يصح. لاجل ما اروح كمان اجييلكو الحكيم والداية
- سعيد** : وأنا اما اروح اجيب الطربوش بتاعي من جوه
- أم أحمد** : والله طيب على كده. الراجل لا ويموت ولا بتيجي له نصيبه وباين حا تروح فلوسنا
- عثمان** : إسمعي. فين الملاحه اللي كان فيها الشطه
- أم أحمد** : يه ليه يا نداهم (موسيقى ١)
- عثمان** : {بس فين قول لي قوام
- أم أحمد** : أهه جوه عندك على الترابيزه. يه قطيعه الراجل ناوي يعمل إيه. إلا الشطه دي كمان (ضجة) يه. دول لازم المزارعين بتوع العمدة^(٣) خش يادلعدني إنت وهو (موسيقى ٢) (رقصة المزارعين)

لحن القطن

بردون يا افندي ياللا ما تواخذناشي	اسمح لنا نشكي لك بلاوينا كده عالماشي
يا اخواننا أحييه وبياه	البياه التيه الثيه الثيه
دا كل اللي جرى لنا السنه دي	ياهو عمره ماجراشي
القطن باينه جننا	طير عقولنا منا

(١) إحدى طرائق عمل القهوة.

(٢) تغيير جملة عثمان: شريككم السم الهاري.

(٣) تغيير الحوار ما بين {...}: عثمان: إنت مالك.

أم أحمد: أهه جوه عندك على الترابيزه اللي في المطبخ. إلا الشطة دي كمان. (ضجه)

ودول إيه كمان. أه دول الجماعة المؤاجرين بتوع العمدة.



من يوم ما سوقه اكسد
 القطن أحيه ع القطن
 {ياما الفلاح لبس واتفنظ
 من كثرة النقدية اتعنظ
 بقى عامل روحه جندي
 قلح الزعبوط والعمه
 وجاب اطروبييل
 كان فاكر القُبَّه فيها
 واهه احنا سته واتداسنا
 من تغفلنا يا افندي
 ماكناش فاكرين إن الحاله
 وبقيت احرت في قطن ازرع في
 لقينا القطن عملك فس
 كنا بنخاف من الدوده
 أتأبيه فيه دوده ثانيه
 خسرت لنا الدنيا
 خربت بيوت بالعنيه
 يا رب الطف ببلادنا
 ورجع لنا حبه
 اشفي لنا فلاحينا
 من مرواح ليلة الحنه
 بس شاطرين يبدد
 ولما يضيع مالنا

وادحننا طالع ديننا
 دا كل اللي جرى لنا من القطن
 السنه اللي فاتت
 وكان عقله شاتت
 ويمزيسكر ويمزبرندي
 وراح قالب بافندي
 ومرافق حكمت وروزيता
 بدال الشيخ دوزينه
 وخازوقنا طلع من راسنا^(١)
 قلعنا القمح والفلول
 حا تبقي بلاد فول
 قطن اجمع في قطن
 وراح بابيه راخر مقفول
 اللي ينزل في القطن تحت
 بتشتغل من تحت تحت
 هلكتنا يا بوسالم
 لإمتى الله العالم
 من عمدها لأهاليها
 المليه لمجاريها
 وخصوصًا في السنين دي
 والتفتيح عند الجندي
 نقعد ننوح ونعدد

(١) حذف الحوار ما بين {...}.



ونقول يا هو كان مالنا
 علشان نربي عيالنا
 يطلع لنا زغاليل
 أهه دا موسم الفايطجيه
 اللي يمصوا في دم الفلاح
 لكن فلاح اليوم ده
 بقى واد حلمنتيشي
 دلوقت فتح عينه
 بقى أمكر من جيمي
 لكن مهما افتقرنا
 يرضينا احنا اولادك

لازم نصون اموالنا
 حاجه من العال يابو خليل
 اللي مالهمش ذمه
 لحد ما يبقى رمه
 جربوع كان والا عمدة
 ولا عااش ياكل يابوي من دول
 علشان يصون قرشينه
 وميت يننى ومانولي
 فيك يا مصر ووحوحنا
 يانيل ونفديك بأرواحنا

العمدة : هو لسه عثمان ما جابلناش القهوة^(١)
سعيد : هيه. خلاص لبست يا عمي
العمدة : أيوه استعجل لنا القهوة
أم أحمد : حالاً أهه. يا عثمان هات القهوة لعمي
عثمان : (داخلًا) اتفضل يا جناب العمدة
العمدة : أيوه هات. اسكيتو دي
عثمان : أيوه اسكيتو شطه زياده (يخرج) آخر فنجال في عمرك داهه
سعيد : أظن يا عمي مشوار الحكيم دا بعيد
العمدة : لا دا حداكم هنا. قريب من هنا^(٢) عند الحصان
سعيد : يعني عند ميدان الأوبرا
العمدة : يا نهار يا رجاله
سعيد : إيه فيه إيه يا عمي. فيه إيه

(١) حذف جملة العمدة.

(٢) حذف: قريب من هنا.



- العمدة** : الراجل حاطط لي في القهوة شطه ابن المركوب. إلحقوني يا ناس حكيم ياهو
- أم أحمد** : سلامتك يا عمي. أجيبك كباية مَيَّه تبرد بقك
- العمدة** : لا لا مافيش لزوم. أنا رايح للحكيم اخليه يشوف حلقي بالمره. يابوي
- سعيد** : أعوذ بالله. دا صحيح عم عثمان حاطط له شطه في القهوة. إزاي ده. عم عثمان. يا عم عثمان
- عثمان** : هو مات ولا لسه
- أم أحمد** : إنت عملت إيه يا مسخم
- سعيد** : {تعالى هنا. إنت عملت كده ليه
- عثمان** : كده ليه إيه^(١)
- سعيد** : بتخط للراجل شطه في القهوة يا شيخ
- عثمان** : النوبه دي شطه. النوبه الجايه سم هاري
- سعيد** : إزاي ده
- عثمان** : بس اسكت إنت. سيبني اخلص عليه. خليني اخلص بفلوسي خلينا ننفض^(٢)
- سعيد** : إيه الكلام الفارغ ده
- أم أحمد** : أيوه له حق. خلينا نخلص. كل من كان أولى بحقه (تخرج)
- عثمان** : لكن احنا موش في كده. دلوقت لو جه عمي اللي جاي من البلد وسألني عن مراتي. أقول له إيه
- سعيد** : وهو عمك عارف إنك متجوز
- عثمان** : أيوه عارف إني أنا متجوز وعندي أم أحمد مراتي
- سعيد** : خازوق. إنما هل هو يعرف مراتك أم أحمد. يعني سبق له شاف وشها قبل دلوقت
- عثمان** : لأ. ولكن أنا ما صدقت إن الراجل صفح عني. وجاي علشان يصالحني. ولما ييجي لازم ضروري اقدم له مراتي. علشان يكون راضي عليّ. ويكتب لي كل الثروة والطين والنخل بتاعه. لأنني أنا الوارث فيه^(٣)

(١) حذف الحوار ما بين {...}.

(٢) إختصار جملة عثمان: سيبني اخلص عليه خلينا ننفض.

(٣) تغيير جملة عثمان: لأ. ولكن هو عارف إني أنا متجوز ولما يجي لازم اقدم له مراتي علشان يكون راضي عني.



- سعيد** : وإيه العمل دلوقت. أنا مش حا يمكنني افرط في أم أحمد. طول ما عمي موجود هنا
- عثمان** : وانت يخلصك دلوقت تورطني قدام عمي. وتخليه يغضب عليّ ثاني بعد ما رضي عني. دا جزا المعروف ماعلش. آدي جزا اللي يسلف مراته معلش
- سعيد** : اسمع اسمع. أنا عندي حل كويس
- عثمان** : حل إيه
- سعيد** : أنا انزل دلوقت اتدبق لك على واحده متريسه من المتريسات بتوعى. واجيبها لك. ولما يجي عمك تقدمها له بصفة مراتك. ازيك في الفكره دي بقى
- عثمان** : وانا كمان عندي فكره كويس
- سعيد** : إيه هي. أحسن من دي
- عثمان** : أحسن من دي ميت مره. ليه ماتجيبش المتريسه بتاعتك. وتقدمها لعمك بصفة مراتك. وتديني أم أحمد مراتي وبنقى خالصين
- سعيد** : يا سلام على أفكارك يا أخي. بعد ما فهمنا عمي إن أم أحمد مراتي. اقوم اقدم له واحده تانيه
- عثمان** : يعني دلوقت اتسجلت أم أحمد إنها مراتك
- سعيد** : لا يا سيدي. ما قلت لك بس على بال ما يسافر عمي. آه. استنى استنى. أنا حانزل ادور لك على واحده من المتريسات بتوعى. قبل ما يجي عمي. بس اسكت إنت (يخرج)
- عثمان** : والله طيب. لسه ماشفتش كده. ياخذ فلوسي ومراتي. {لا والخازوق لو جه عمي. قبل ما يجيب المتريسه اللي بيقول عليه. يروح ميراثي. هي راحت فين الوليه أم أحمد. يا أم أحمد يا أم أحمد^(١) (موسيقى ١)}
- العمدة** : (من الداخل) أيوه يا دكتور
- عثمان** : دكتور إيه. إخص^(٢) الراجل العمدة ابن المركوب^(٣) راح بعت لنا كل دكاترة البلد. يخرب بيته^(٤) (يخرج) اتفضل يا دكتور

(١) إختصار الحوار ما بين {...}: ويقوِّي متريسه. هي راحت فين الوليه دي أم أحمد.

(٢) تم حذفها.

(٣) تغيير "ابن المركوب": المجنون.

(٤) حذف: يخرب بيته.



لحن الدكاترة

دكاترة	مين عيان هنا هو نقاوله من غير لا بنج ولا دياولو ما دام كريزه وفلوس مافيشي حا نعمل إيه دخنا يا بيه كان المريض في الأول يجري "دلوقت لو يلقي روحه مهري يقول في عقله مهمًا طراً له أخذ لي شربه أخذ لي لبخه إيه يا جماعه يا دكاترتنا ليه ماتحافظوش على صحتنا طوفولكو في البلد طوفه {اشي كوكاين اشي خماير إيه اللي نقدر بس عليه ما تشرحم ليه شاكين ليه آدحننا نخدمكم بعنيينا بلاوي إيه وأخطار إيه الكوكاين داهو اللي كل يوم ضحاياه في بلادنا يا هو بقت بالكوم ماتعملولكوهمه وراقبوا الأجزاءيه
الأولاد	
دكاترة	
الأولاد	

(١) كلمة باللغة الفرنسية "Courageux" وتعني: شجاع.

(٢) حذف البيت.



اللي مالهمش ذمه وفاقوا المخانجيه^(١)
ياخواننا دا حرام فين الصحة فين
دي لازم مقصوديه يا دكتور حسانين
دولسه سماوييه دولسه أونطجيه
لما نضيّق عليهم أهه دا الواجب بتاعنا
مهما يسطلوننا مهما يمدنونا
المصري برضه مصري واسمه ابن الفراعنه
إيه اللي نقدر بس عليه

دكاترة

ما تشرحهم ليه ساكتين ليه
آدحننا نخدمكم بعيننا

بلاوي إيه وأخطار إيه
التصريح بالخمرة يا بيه وبالسهر دا لازمته إيه
ما دام دا شيء يتلف أخلاقنا ليه نسمح به ليه نصرح ليه
كان اللي يسهر لنص الليل يروح لبيتة فايق صاحي
دلوقت طول ماهو لاقى مرتيل^(٢) وسهر ياخذها صباحي
خمرة سموم كوكابين بقى دي يا ناس ياهو شروط المدينه
دي كلها آفات يابو خليل تفتح لكل نقيصه سبيل
ماتقوليشي ماتعيدلشي

فتحية

المدينه صحيح مدينة أجدادك يابن النيل

عثمان : {{(داخلًا) إيه الرأي دلوقت. لما يجي عمي راح نقول له إيه

أم أحمد : تعرف شغلك. أهى وحلتك

عثمان : آه يا ربى

(١) بائعي وصانعي المواد المخدرة.
(٢) نوع من الخمور.



- أم أحمد : كبدي ياخويا.^(١) وهو راح فين سعيد بيه
- عثمان : راح يجيب لي المتريسه
- أم أحمد : متريسه إيه يا لهوي
- عثمان : أيوه متريسه.^(٢) علشان لما يجي عمي. نقدمها له بصفة مراقي
- أم أحمد : مراتك؟ يه وانا
- عثمان : إنت مرات سعيد بيه لحد ما يسافر عمه
- أم أحمد : لا أبدأ أنا ما اطقش اشوفك ويا واحده تانيه قدام عيني.^(٣) يا لهوي متريسه
- عثمان : وإيه العمل. آديني في إيدك دبريني
- أم أحمد : اسمع أما اقولك. لما يجي عمك ويقول لك فين مراتك. قول له مراقي راحت
- تطل على أمها عيانه. جهة حلوان والا الجيزة
- عثمان : أيوه والله برضه فكره. واقله إنك إنت أخت مراقي. ومراقي شبهك تمام.
- علشان لما يسافر العمدة. نرجع تاني نقدمك لعمي بصفة مراقي اللي كانت مسافره
- أم أحمد : أيوه كده مش تقول لي متريسه. أنا اقدر اشوفك ويا واحده تانيه واسكت.
- أنا كنت اموت روحي
- عثمان : يا سلام. أنا ما كنتش اعرف إنك بتحبني كده يا مراقي
- أم أحمد : أحبك. دانا ادوب فيك (يدخل عم عثمان) يه ده إيه ده
- عثمان : {مراقي حاسه بحاجه. فيه حاجه بتلعب
- أم أحمد : تلعب إيه وتسخم إيه. شوف إيه دا اللي وراك^(٤)}
- العم : عثمان
- عثمان : عمي عمي (يسلمون)
- العم : إزيك يا عثمان ماشا الله ماشا الله. دانت بتحب مراتك خالص

(١) تغيير الحوار ما بين {...}: أم أحمد: بس طول بالك

عثمان: أطول بالي إيه.

(٢) تم حذفها.

(٣) حذف: قدام عيني.

(٤) إختصار الحوار ما بين {...}: عثمان: حاسه بحاجه

أم أحمد: حاجه إيه. شوف إيه ده اللي وراك.



- عثمان : مراقي؟ إخ اتلبخنا.^(١) لا يا عمي مراقي..
- أم أحمد : مسافره عند أمها
- العم : مالك يابني ما تتكلم جرى لك إيه
- عثمان : لا يا عمي. بس مراقي.. بقى لها يومين دلوقت..
- العم : آه بقى لها يومين زعلانه منك. علشان كده كنت بتبوسها وتسالحها
- عثمان : إخص دا كان واحد باله
- العم : أيوه يابني. موش لازم تزعل مراتك أبدًا. لازم تستجلب رضاها. شوف يابني. حيث إنك بقيت متجاوز ومراتك حامل. وبكره تبقى صاحب أولاد. أنا راح نكتب لك كل ما ورايا وما قدامي
- عثمان : إرمي.^(٢) آهه دلوقت لو قلت له مش مراقي. يقولي إنت كنت بتبصص لها
- أم أحمد : قول له ماتخافش
- العم : يقولي على إيه. إنتو لازمكم حاجه
- عثمان : لا يا عمي. أنا قصدي اقولك على مراقي
- العم : آه. يعني قصدك تقولي إن مراتك حبله. شايفها بطنها كبير. ما شالله ما شالله
- عثمان : لا مش مراقي دي
- العم : مش مراتك دي. ليه إنت متجاوز اتنين يا ابني
- أم أحمد : فهمه زي الناس
- العم : بتقولوا إيه فهموني. أنا مش فاهم حاجه
- عثمان : لا أنا افهمك يا عمي. بقى دي موش مراقي. دي أخت مراقي
- العم : مش مراتك؟ أمال إزاي كنت بتبوسها يا كلب يا فلاني
- عثمان : آه. ماعلش يا عمي. أنا اقولك على الحقيقه^(٣)
- أم أحمد : لا يا عمي دا ما كانش ببيوسني. دا كان زعلان مني وانا ببيوس راسه
- عثمان : أيوه كانت بتبوس راسي
- العم : آه. أنا باحسب كنت بتبوسها. وهي فين مراتك

(١) تم حذفها.

(٢) تغيرت: إيه الرأي.

(٣) تغيير جملة عثمان: كده كويس.



- عثمان : وهي فين مراتي؟
- أم أحمد : راحت تطل على أمها عيانه. جهة حلوان والا الجيزة يا نيله
- عثمان : راحت تطل على أمها عيانه. جهة حلوان والا الجيزة يا نيله
- العم : ومش مراتك حامل زي مافهمتنني في الجواب اللي بعثته
- عثمان : أيوه حامل. لأ وشوف الغريبه يا عمي. تشوف مراتي شبه اختها دي تمام.
- شكلها وجسمها وبطنها وتشوف دي تقول هي مراتي
- العم : ما دام اخوات شققه. مش بعيد إنهم يكونوا شكل واحد
- سعيد : يا عثمان. يا عثمان
- عثمان : اكبس^(١)
- سعيد : خد ودّي دول المطبخ
- عثمان : إخص الله يطبخك في بعضك
- العم : إيه إيه. مين حضرتته
- عثمان : لا حضرتته. حضرتته يا عمي جوز الست أخت مراتي. ويبقى الوكيل بتاعي في المحل التجاري بتاعي
- العم : تشرفنا
- سعيد : إنت عملت إيه
- عثمان : عملك اسود. إلا قوئي يا عمي. جنابك مش حا تشرفنا هنا قد كام يوم
- العم : أيوه. أنا بعون الله راح نستنى هنا. لحد ما نظمن على الست مراتك لما توضع
- عثمان : إرمي
- العم : وبعد السبوع ناخذكم على كوم امبو. أسلمك أطباني والنخلات لأنني أنا بابني بقيت ياللا حسن الختام
- سعيد
- وعثمان : آه من الختام ده
- العم : قوئي بابني. مراتك راح تستنى عند الست امها كتير
- أم أحمد : راح تستنى يومين تلاته
- عثمان : راح تستنى يومين تلاته

(١) تم حذفها.



- العم** : أيوه. لأنني أنا مشتاق اشوفها وافرح بها
- عثمان** : شوف دي. ما هي دي زي مراقي تمام^(١). افرح بها زي مانت عايز
- العم** : لا يا ابني استغفر الله. لازم اشوف مراتك الي في عصمتك. اسمع يا بني عثمان. مافيش حته طاهره هنا أصلي فيها العشا
- أم أحمد** : {أيوه. اتفضل جوه فيه أوضه نضيفه}^(٢)
- سعيد** : تعالى هنا فهمني. إنت عملت إيه
- عثمان** : عملت إيه إيه. الجماعة الدكاتره الي كانوا هنا^(٣) خرجوا وسابوا الباب مفتوح. وانا واقف هنا باتكلم مع أم أحمد وبتبوسني^(٤) بصيت لقيت عمي ورايا زي الجن
- أم أحمد** : (داخله) إيه العمل بقى يا اجواز الهنا (جرس)
- عثمان** : إرمي. مين دا كمان عم تالت
- سعيد** : روح شوف مين
- عثمان** : شوف مين إنت
- سعيد** : ليه
- عثمان** : أنا كل ما اروح اشوف يطلع عم
- أم أحمد** : ياختي قطيعه. خايفين كده ليه. أنا اروح أنا
- سعيد** : يا ترى مين ده يا عم عثمان
- عثمان** : ما داهيه لتكون متريسه من المتريسات بتوعك. ويمسكوا في بعض هي وأم أحمد. إيه العمل^(٥)
- سعيد** : خازوق
- العمدة** : إنت اللي قالك تشتغلي وتيجي تفتحي الباب مين. أmaal الخدام اللطخ ده واقف هنا بيعمل إيه. روحي على أوضتك جوه
- عثمان** : عجبك كده كويس
- سعيد** : ماعلش طول بالك

(١) حذف: ماهي دي زي مراقي تمام.

(٢) تغيير جملة "أم أحمد": عثمان: أيوه فيه. أم أحمد ودِّي عمي يصلي. صلي يابو زعيزع.

(٣) تغيير "كانوا هنا" بـ "بعتهم عمك".

(٤) تم حذفها.

(٥) تغيير "ويمسكوا في بعض هي وأم أحمد. إيه العمل": وتمسك في الوليه تسقطها.



- العمدة** : أهه جناب الدكتور اهه يا ابن اخويا. دلوقت الداية زمانها جايه ورايا بعدتها
- عثمان** : أيوه بعدتها وأمواسها
- العمدة** : إنت يا جدد ورينا عرض اكتافك بالتالي هي أحسن. روح دلوقت. أحسن
- حا نعمل كنسولتو على الست جوه
- عثمان** : كنسولتو؟ كنسولتو إيه ياخويا
- العمدة** : دا مهفوف دا والا إيه. يعني حا نكشف عليها
- عثمان** : إيه تكشفوا على أم أحمد. دا اللي يكشف عليها أنا اكشف عمره
- سعيد** : يا أخي هس. ماتخسرش المسألة. دي فيها ميراث بزيه
- عثمان** : لا يا سيدي يفتح الله. أنا عندي ميراث تاني مافيهش لا كشف ولا حاجه
- العمدة** : يعني إنت حا تخرج من هنا والا لأ. امشي روح اكنس وامسح^(١) وشوف
- شغلك جاك ايشي
- الدكتور** : لا لا ماعلهش خلوا الخدام هنا ويانا. يمكن يلزمني ابعته هنا والا هنا
- العمدة** : طيب بس يقعد كده على جنب ويتليس. أحسن والله اخلي نهاره نهار
- عثمان** : أما تطلع بره أنا افرجك
- الدكتور** : هي راحت فين الست
- العمدة** : أظن دخلت أوضتها
- الدكتور** : إنده لها من فضلك
- العمدة** : يا فريدة هانم
- أم أحمد** : عينيّا
- العمدة** : إطلعي هنا
- أم أحمد** : إيه فيه إيه
- العمدة** : لا بس جناب الدكتور عايز يجسك
- أم أحمد** : يجسني؟ مين يقدر يحط إيده عليّ. ليه خرعه والا إيه. أنا مكن على كيفك^(٢)
- عثمان** : أيوه كده
- سعيد** : إيه ده مش كده

(١) حذف "روح اكنس وامسح".

(٢) تغيير جملة أم أحمد: يجسني. إبعد. ليه. دا اللي يحط إيده عليّ أنا اعدمه.



- عثمان :** سيبها خليها تشوف شغلها وياهم دي أم أحمد المجسجسته
- سعيد :** يا سيدي بس اسكت إنت
- العمدة :** لا بس كلمه صغيره يا هانم
- الدكتور :** قبل كل شيء قولي من فضلك يا عزيزي. ماتتذكرش إمتى ابتدأت أعراض الحمل عند الست
- سعيد :** أظن من يوم.. من يوم
- عثمان :** من يوم ما حبلت ودي عايزه كلام
- الدكتور :** أنا بدى أعرف الست حبله من أي شهر ولو بالتقريب
- عثمان :** أظن حبله من جماد
- العمدة :** اللهم طولك يا روح
- عثمان :** روح إنت سافر في داهيه. وخلي الناس تاخذ حقوقها^(١)
- الدكتور :** غريبه دي
- العمدة :** إيه هي اللي غريبه
- الدكتور :** على الحساب ده. الست حبله في تسع تشهر دلوقت (السعيد) حضرتك متأكد إن التاريخ ده مضبوط
- سعيد :** يجوز اكون غلطان غايته في كام يوم
- عثمان :** لا يا سيدي اسألني أنا. الست حبله من قبل الست اشهر المتأخرين عليك بتلات اشهر يبقى تسع تشهر
- سعيد :** طيب خلاص انتهينا
- الدكتور :** طيب أنا حاكب لها على دوا.. أهه خلوها تاخذ من الدوا ده كل نص ساعه معلقة شوربه
- العمدة :** لا لا ارجع. هات أنا اجيبه أنا. دا راجل عبيط يمكن يغلط ويحجب لنا روح الفنيك والا حاجه
- الدكتور :** الغايه أنا مرّوح دلوقت. وكلها نص ساعه وتكون الداية عندكم هنا
- العمدة :** طيب اصبر يا دكتور. أنا نازل وياك اهه.. أنا حاجيب الدوا وجاي حالاً يا ابن اخويا

(١) حذف "وخلي الناس تاخذ حقوقها".



- عثمان** : الله لا يرجعك لا إنت ولا الدوا. إيه الرأي بقى يا ابن اخوه. إيه العمل مع
عمك ابن الحمار
- سعيد** : إيه هو ده. اختشي يا شيخ
- عثمان** : يا سيدي أنا سلفتك مراقي علشان تقدمها لعمك وبعدين استلمها تاني. موش
علشان تاخدها تولدها وتعمل لها عمليات وكلام فارغ
- أم أحمد** : والنبي ياختي أنا حاجتن دا شيء يوحس الي ما يتوحس
- عثمان** : إلا قول لي عمي راح فين
- أم أحمد** : هس مات عفش. أحسن هو بعد ما صلى نام
- عثمان** : نام؟ شوف الإنسانيه شوف الحساسه الراجل صلى ونام على طول. عملهاش
عمك الباردا (جرس)
- الداية** : من هنا يادلعدى (من الداخل)
- الجميع** : ودا إيه دا كمان
- الداية** : العواف يا جماعه
- سعيد** : الله يعافيك. مين حضرتك
- الداية** : أنا يادلعدى عايزه الست الي حا تولد
- سعيد** : آه. حضرتك الست الداية
- الداية** : أيوه يادلعدى وفين الست. أظن حضرتها. موش كده
- أم أحمد** : أيوه
- وسعيد** : وفين أمال جوزها
- الداية** : جوزها؟ تعالي بقى. عاوزه جوزها مين فيهم بقى
- عثمان** : إزاي الكلام ده. هي لها كام جوز يادلعدى
- الداية** : هي لها جوز. ألا قول لي. هي ضروري الي تولد تعرف مين أبو الولد
- عثمان** : لا موش ضروري. إنما ليه السؤال دا بقى
- الداية** : لا بس علشان أبو الولد لسه مات بتتشت شخصيته زي الناس
- عثمان** : آه. مفهوم مفهوم. ماعلهش أنا راسيه برضه
- الداية** : آه. مفهوم مفهوم. ماعلهش أنا راسيه برضه



- عثمان : برضه عندك سلفيات زي دي
- الداية : ياما أسرار زي دي عندي ياما.. من حق بردون يا هانم. اتفضلي خشي جوه أؤضتك. {اتفضلي هنا
- عثمان : وانا كمان
- سعيد : يا سيدي إنت مالك
- الداية : لا بس الست. اتفضلي^(١)
- العمدة : (داخلاً) أهه الدوا أهه. ابقوا ادوها زي ما قال الدكتور. ثلاث معالق في اليوم. وهي فبن الست أُمال
- عثمان : هس الست في أوضتها وويهاها الداية
- العمدة : الداية جات
- سعيد : أيوه جات
- العمدة : هيه. وحصل ولاده والا لسه
- عثمان : حصل خير
- العم : يا عثمان (من الداخل)
- عثمان : إرمي. هجمت الأعمام أهه
- العم : سلام عليكم
- العمدة : عليكم السلام. دا إيه ده
- العم : مين حضرته
- عثمان : حضرته حضرته يا عمي. عم جوز أخت الست بتاعي. يخرب بيتكم
- العمدة : ما تقوئي مين ده (لسعيد)
- سعيد : حضرته يا عمي عم عثمان
- العمدة : تشرفنا. يعني عمك باين عليه راجل طيب. أُمال إنت مالك ابن وطا ليه
- العم : إيه. بيقول إيه يا عثمان

(١) تغيير الحوار ما بين {...}: أم أحمد: بس أنا خايفه
عثمان: خايفه من إيه. أنا كمان داخل
سعيد: داخل تعمل إيه
عثمان: أنا حاسس بحاجة أنا راخر
سعيد: حاسس إيه (يدفعه).



- عثمان : لا يا عمي دا مبسوط منك. إيه الرأي في عمك البارد دلوقت. الحمد لله
الراجل مايعرفش عربي كتير
- العم : قولي يا ابن اخويا. الست مراتك لسه ماجاتش
- عثمان : لا لسه ماجاتش. وانا بعت جواب لسه ماردوش عليّ (ضجة)
- الجميع : إيه جرى إيه
- العمدة : يا ألف ليله بيضه. يا ألف ليله بيضه
- العم : خير إيه فيه إيه يا عثمان
- عثمان : لا الست أخت مراقي بتولد
- العم : يا ألف ليله بيضه. يا ألف ليله بيضه. لما اشوف مراتك وهي بتولد يا ابني
- عثمان : لازم رخره بتولد عند امها في حلوان والا الجيزة لأنهم لتنين حبلاوا في يوم واحد
- الداية : ياللا هاتوا لي قوام فوط وميّه سخنه وملايات فرش وشراميط ياللا
- الجميع : فوط ملايات فرش شراميط ميّه سخنه
- عثمان : تعالي طمنييني. جابت بنت والا ولد
- الداية : لا بنت ولا ولد
- عثمان : إخص.^(١) أمال جابت إيه أوتوموبيل
- الداية : ماجابتش حاجه. دا اتابيه كان هوا مخزن في بطنها
- عثمان : هوا. طيب اعمل معروف ماتجيش سيره قدام العمدة. والراجل العجوز
التاني. قولي لهم إنها ولدت بالكذب^(٢)
- الداية : ماتخافش ماتخافش. الست رستني على كل حاجه
- عثمان : ميّه سخنه. ماحدش يخش ماحدش يخش
- الجميع : ماحدش يخش
- (يسمع ضجة وزغاريط وتدخل الدايات البلدي) (وينشدون اللحن)

(١) تغيرت: الله.

(٢) تغيير جملة عثمان: هوا. والله طيب على اولاد هوا دول ياخويا. طيب اعمل معروف ماتجيش سيره قدام العمدة داهه. والراجل الاسود التاني. قولي لهم إنها ولدت بالزور.



لحن الدايات البلدي

يا بنات يا جيراننا تعالوا ياختي على خفة دمه أنا في عرضكم يا سيادي كنت فاكرها راح تولد يا بنات يا جيراننا تعالوا	البربري الجميع
نرف أبو سمرة وعياله على بطته وجماله خشوا زفوا أم اولادي أتابيهها بطنها نفادي نرف أبو سمرة وعياله	فتحية الجميع
هيص يابو سمرة واتبحج ما دام خلفت اتبحج هذبهم واهتم بهم في صغرهم يا بنات يا جيراننا تعالوا	البربري فتحية الجميع
تعالوا هيصوا وانشالوا أهه شמוש الفرخ طلعت لما تبعت ابنك من صغره تلاقيه بعدين في كبره دي بلادنا يا اسيدانا حبها مطبوع يا بنات يا جيراننا تعالوا	البربري فتحية الجميع
وانهبدا في حضني تعالوا والسعد أهه هل هلاله يتعلم يا عثمان ينفع بلده في كل أوان في فؤادنا زي الدين والإيمان نرف أبو سمرة وعياله	البربري الجميع
والنبي ترقص قبلنا والنبي ترقص والنبي ترقص	البربري الجميع البربري
مارقــــــــــــــــصــــــــــــــــش مارقــــــــــــــــصــــــــــــــــش	



ندراً عليّ لرقصلكوا
 خد اتحزم بالمنديل ده
 غني يادلعي يا زليخة
 خدوا دي شومه عال مبرومه
 ولاسه غباني مالهاش تاني
 لازم نرفك في البلد
 يوم ما ننول الي في بالنا
 يا أخف مخلوق في الجيل ده
 وسعي يادلعي يا متبلده
 من فطومة لابو عفان
 شغل ياباني لبس الجدعان
 يابو العريس الي اتولد

ستار



الفصل الثالث

ام احمد والله طيب يا هفتي (يدخلونه من البيت)

سيد انت فيه ايه ^{له} ايه العمل دلوقت يا ام احمد

ام احمد فيه ايه

سيد انت فيه ايه . اهل محي فاوتني منه ساعة حافيت

الدايه . قال عايز يشوف الصبل اللي اتولد . وما جيب

له عمل فيه . دلوقت ايه الراي . انا ما جتبه

ام احمد بس طول بالآله . اهل الش الدايه قالت لي انظر

ستفقر ويايا انظر تدبيرة لي علي عمل منه تحت الارض

ايه تدبيرة علي عمل منه تحت الارض

سيد ابوه لان انه ما كانش كده . ما تنفع المبان .

ونحني بفض علي دمه ما يملني اهد منه ولو عيتم

الفصل الثالث

- أم أحمد : {والله طيب ياختي
سعيد : إنت فين. إيه العمل دلوقت يا أم أحمد
أم أحمد : فيه إيه
سعيد : فيه إيه إيه. ^(١) أهه عمي خاوتني من ساعة ما خرجت الداية. قال عايز يشوف العيل اللي اتولد. وحاجيب له عيل منين. دلوقت إيه الرأي. أنا حا تجنن
أم أحمد : يه بس طول بالك. أهى الست الداية متفقته ويايا إنها تدبق لي على عيل من تحت الأرض
سعيد : أيوه لأن إن ماکانش كده. حا تتفضح العبارة. وعمي يغضب عليّ ومش حا يمكني آخذ منه ولا ملیم
أم أحمد : لا ماتخافش. بس هو راح على فين المسخّم على عينه ^(٢) عثمان كنا نبعتّه يستعجل الداية قبل ما يصحى عمك
سعيد : آه من حق اسمعي اسمعي
أم أحمد : إيه فيه إيه
سعيد : أما اروح اسك الأوضه على عمي. علشان مايقلقش ويصحى قبل ما تيجي الداية. طولي بالك (يخرج)
أم أحمد : والله طيب على كده. كلنا موحولين في مجايب حتة عيل
عثمان : (من الخارج) همّ راحوا فين
أم أحمد : تعال هنا إنت كنت فين
عثمان : هس اوعى تتكلم ويايا. وليّه غشاشه ماعنديكيش ذمه
أم أحمد : يه. دا جرى له إيه ده
عثمان : إخص. ^(٣) حتى الغش في الحبلّ كمان
أم أحمد : يه وانا حاعمل لك إيه. ماهو إنت

(١) إختصار الحوار ما بين {...}: (سعيد وأم أحمد يدخلون من اليمين) سعيد: إيه العمل دلوقت يا أم أحمد.

(٢) حذف: المسخّم على عينه.

(٣) تم حذفها.



- عثمان : أنا. أنا مالي. إنت اللي قلت لي إن أنا حبله. وخليتني عرّفت عمي في الجواب
الي بعته له إنك حبله. ودلوقت مش ممكن حاسافر إلا لما يشوف بنتي
- أم أحمد : يه من حق اسمع. أهى الست الداية متفقها ويايا. إنها حاسجيب لي عيل.
ولما تجيبه ابقى قدمه لعمك بصفته ابنك
- عثمان : يا سلام على مخك الوسخ
- أم أحمد : مخي وسخ؟ ليه بقى
- عثمان : معلوم. علشان عمي عاوز بنت مش عاوز ولد
- أم أحمد : بس طول بالك. يمكن لاجل بختك تجيب بنت
- عثمان : {أهه إذا كانت تجيب بنت. راح نكون أنا سعيد خالص لأن عمي مصمم إنه
يشوف البنت. وإن ماشافش البنت حاسافر زعلان ويغضب عليّ. ويحرمني
من ميراثه
- أم أحمد : لا ماتخافش. إنشا الله رايحه تجيب بنت
- عثمان : لكن إحنا موش في كده. دلوقت لو جابت بنت راح نقدمها لعمي. وفين
أمها؟^(١)
- أم أحمد : آه. بقينا في أمها
- عثمان : معلوم. لازم نجيب بنت وامها يا بلاش
- أم أحمد : أنا امها
- عثمان : لا ياختي
- أم أحمد : لأ ليه
- عثمان : علشان عمي دلوقت فاهم إنك مرأة سعيد بيه. وإذا كنت راح نقوله تاني
إنك مرااتي. راح يفهم إن العبارة أونطه ويزعل مني
- أم أحمد : وإيه العمل دلوقت
- عثمان : مافيش لا عمل ولا غيره. أحسن طريقه دلوقت إني اموت نفسي. ولا اطلعش
كداب قدام عمي
- أم أحمد : لا يا خويا بعد الشر
- عثمان : شر مر بر أنا ما بقى ليش عيشه والسلام

(١) إختصار الحوار ما بين {..}: عثمان: لكن دلوقت لو جابت بنت راح نقدمها لعمي. وفين أمها؟



- أم أحمد :** طب اسمع أنا جت لي فكره كويسه
- عثمان :** فكرة إيه كمان
- أم أحمد :** دلوقت لما الداية تجيب العيل وتيجي. أنا ادى لها قرشين وتنفق وياها. إنك تقدمها لعمك بصفة مراتك. ازيك بقى في الفكره دي
- عثمان :** {الحمد لله أنا دلوقت انكتب لي عمر جديد. أنا ماكتتش اعرف إنك كده يا مراتي
- أم أحمد :** باقولك مراتك على كيفك
- عثمان :** أيوه على كيفي في الأونطه بس. موش على كيفي في الحبل. اسمعي هو راح فين سعيد بيه
- أم أحمد :** راح يسك الأوضه على عمه. علشان مايقلقش. على بال ما تيجي الداية بالعيل
- عثمان :** أيوه كويس. إذا كان يفضل نايم لحد الداية ما تجيب العيل. واقدمه لعمي يشوفه ويسافر. وبعدين يصحى. كان يبقى ابن حلال خالص
- أم أحمد :** وهو فين عمك
- عثمان :** عمي نايم في المندره تحت. اسمعي اسمعي. أما اروح أنا كمان اسك عليه الباب بشويش. علشان مايصحاش قبل ما تيجي الداية^(١)
- أم أحمد :** (موسيقى ١) (يخرج)
- أم أحمد :** مسكين يا قلبي. الراجل حا يتجنن معذور. ربنا مايحكمش على حد (ضجة الراقصات)
- أم أحمد :** يُه إيه الهيصه دي. آه. دول اللعب اللي وصى عليهم العمدة علشان المولود الجديد. من هنا يادلعدى (تخرج)
- أم أحمد :** (موسيقى ٢) (رقصة)
- سعيد :** هين. عملت إيه يا أم أحمد. لسه ماجاتش الست الداية
- أم أحمد :** ماجاتش وادحنا لايصين أهه
- عثمان :** (من الداخل) أيوه أيوه

(١) إختصار وتغيير الحوار ما بين {...}: عثمان: كويس. وهو راح فين سعيد بيه
 أم أحمد: راح يسك الأوضه على عمه. علشان مايقلقش. على بال ما تيجي
 الداية بالعيل. وهو فين عمك
 عثمان: نايم أهه في المندره. اسمع. أنا كمان اسك الباب عليه علشان
 مايصحاش قبل ما تيجي الداية.



- أم أحمد :** يه استنى أما نشوف مين
- سعيد :** إيه. مين دا اللي وياك يا عم عثمان
- عثمان :** دي الست الداية
- سعيد :** هي جت
- الداية :** عواف عليكم
- أم أحمد :** تعالي. غبت كده ليه يا شيخه
- الداية :** غبت؟ لهي مجايب العيال بالساهل والا إيه. دنا دخت على بال ما جبتها.^(١)
- خدي سمي عليها يادلعدي
- أم أحمد :** ياختي عليها وعلى ننوسها زي القمر يا عثمان
- الداية :** أيوه دا أبوها راجل أرناؤوطي. وخذناها من وراه. وأمها تركية زي البدر. وكتر
- ألف خيرها اللي رضيت تسلفهالي
- سعيد :** أمها. ليه هي بنت
- الداية :** آه بنت
- عثمان :** الحمد لله. آدي اللي أنا عاوزه. أنا اللي حاورث^(٢)
- سعيد :** إزاي ده. إحنا قايلين لك على ولد يا ستي
- عثمان :** أهه اللي لقيته. حاخلقه والا إيه
- سعيد :** أما وليه مغفله صحيح
- عثمان :** ماتعبش روحك. حسب نواياكم ترزقون. اسمعي. خدي الست الداية اتفقي
- وياها. زي ما قلتلك. علشان اقدمها لعمي بصفة مراتي^(٣)
- أم أحمد :** آه. من حق اسمعي يا ست الداية. تعالي ويايا لحد جوه. أحسن أنا عاوزاكي
- في كلمتين
- الداية :** على عيني
- عثمان :** إغمزيها
- سعيد :** إيه الرأي دلوقت يا اخينا

(١) حذف: دنا دخت على بال ما جبتها.

(٢) حذف: أنا اللي حاورث.

(٣) إختصار جملة عثمان: ماتعبش روحك. اسمعي. خدي الست الداية اتفقي وياها. علشان اقدمها لعمي بصفة مراتي.



- عثمان** : مافيش لا رأي ولا غيره. هو لازم عمك مش مسامح في طينه. علشان كده. ربنا بعثلك بنت مش ولد
- الداية** : بس كده على عيني
- عثمان** : هين. اتفقت وياها
- أم أحمد** : أيوه خلاص
- عثمان** : كويس. أما اروح اقلق^(١) عمي بقى. علشان يجي يشوف البنت وامها^(٢)
- سعيد** : إنتو بتقولوا إيه. أنا عايز تطلعي وتنزلي دلوقت حالاً بولد. وخدي مني اللي إنتِ عاوزاه^(٣)
- الداية** : طيب طول بالك. أنا افكرت واحده من زبائني. كنت ولدتها الجمعة اللي فاتت ولد. أما اروح اترجأها واجيبه منها. بس اعملوا معروف. خلوا بالكو من البنت. على بال ما آجي.^(٤) أحسن ابوها راجل أرناؤوطي لومنجي وخذناها من وراه
- أم أحمد** : يا لعب يا لعب (خبط)
- سعيد** : إخ عمي صحي. استنى لما اروح افتح له. بس أنا خايف لا الداية تطب علينا بالولد الثاني وهو هنا
- أم أحمد** : لا ماتخافش أنا ابقى اعملك حاجه اخليه لك يخرج حالاً
- سعيد** : أيوه اعلمي معروف يا أم أحمد
- أم أحمد** : بس أنا خايفه لحسن يصحى عم جوزي عثمان لآخر. تبقى فضيحه. ياختي قطيعه لما اغطي البنت لا تبرد
- العمدة** : هو الراجل المخدم مابعتش الداده والمرضعه
- سعيد** : لا لسه
- العمدة** : هو فين الولد أُمال
- سعيد** : أهه مع أمه أهه
- العمدة** : طيب ورَّيهلي خليني اشوفه وافرح به

(١) تغيرت: أصحي.

(٢) تغيرت: ويسافر.

(٣) حذف: وخدي مني اللي إنتِ عاوزاه.

(٤) حذف: على بال ما آجي.



- أم أحمد : هس. ماحدش يجي جنبه.^(١) أحسن أنا ما صدقت إنه نام
- العمدة : أيوه أيوه خليه ينام
- سعيد : أيوه أيوه خليه ينام
- العمدة : لكن يا ابن اخويا أنا نفسي ابص في وشه ولو بصه واحده
- أم أحمد : طب بص في وشه بس ولا تمسكوش.^(٢) أحسن الست الداية منهبه علينا.
- ماحدش يمسه قبل ما يسبح
- سعيد : إيه الرأي خليه يخرج لا تطب علينا الداية دلوقت
- أم أحمد : بس كده. آه إلحقوني. إلحقوني يا ناس
- العمدة : إيه فيه إيه. سلامت. فيه إيه مالك. هات كرسي هنا يا وله
- أم أحمد : آه آه آه
- العمدة : إيه حاسه بإيه يا مرات ابن اخويا. كباية ميه قوام يا وله
- سعيد : أيوه حالاً اهه
- عثمان : جرى إيه.^(٣) مراقي مالك
- العمدة : هي إيه اللي مراتك. إتاخر بعيد جاك بلا
- سعيد : {خد المنيّه اهه يا عمي
- عثمان : مية إيه تعالى هنا. إنت عملت إيه في الوليه. أنا مسلمها لك سليمه
- سعيد : يا سيدي طول بالك. دلوقت افهمك
- عثمان : قولي لي بس. فيه إيه يا مراقي
- سعيد : يا سيدي مش وقت هزار
- عثمان : هزار؟ الكلام ده فيه هزار؟^(٤)
- أم أحمد : إلحقوني. حكيم ياخواتي آه
- العمدة : حكيم؟ أيوه أنا ارواح اجيب الحكيم حالاً اهه
- أم أحمد : هوّ خرج

(١) تغيرت: نواحيه.

(٢) تغيرت: ولا تمدهش إيدك عليه.

(٣) حذف: جرى إيه.

(٤) تغيير الحوار ما بين [...] سعيد: لسه ما فاقتش عثمان: تعالى هنا. أنا مسلفك الوليه سليمه عملت فيها إيه.



- سعيد** : أيوه خرج (يضحكون)
- عثمان** : فهموني.^(١) هو إيه اللي خرج
- سعيد** : يا سيدي احنا كنا بنعمل الأونطه دي. علشان نخلي عمي يخرج. على بال الداية ما تجيب الولد
- عثمان** : يخرب بيت أبوكم. ليه هي الداية رُوحت. لازم بقى ما اتفقتيش وياها زي ما قتللك
- أم أحمد** : أيوه اتفقت. بس راحت تجيب ولد علشان نقدمه لعم سعيد بيه بدال البنت دي^(٢)
- سعيد** : من حق اسمعوا. أما ارواح الحق عمي قبل ما يجيب الحكيم. واقوله إن الست خُفّت ولا فيش لزوم
- أم أحمد** : أيوه روح الحق
- سعيد** : ولما تبجي الداية ابقي خدي منها الولد. وادبها البنت ترجعها
- عثمان** : تديها البنت ازاي. أُمال أنا حاقدّم إيه لعمي
- أم أحمد** : لا ماتخافش. علشان عمك لسه مش عارف حاجه
- عثمان** : آه يا حسب (يخرج)
- العم** : {من الخارج} هو راح فين عثمان ابن اخويا
- عثمان** : إخ. أهه عمي صحي. أقوله إيه دلوقت
- أم أحمد** : حا تقوله إيه. خد آدي البنت
- عثمان** : أديله البنت ازاي يا ستي. وفين الداية بس هي حا تغيب كثير
- أم أحمد** : زمانها جايه
- العم** : (داخلًا) إنت فين يا ابني يا عثمان
- عثمان** : أنا هنا يا عمي
- العم** : الست مراتك لسه ماجاتش
- عثمان** : إخ. آدي عيبه
- أم أحمد** : لا زمانها جايه.. ماتلخمش ياباي

(١) تم حذفها.

(٢) حذف: بدال البنت دي.



- عثمان** : أيوه يا عمي زمانها جايه.. ودا إيه اللي حا يخرجه دا لآخر؟ ما تسخسخي له راخر
- العم** : من حق اسمع يا ابني. أنا رايح لحد عمك الشيخ عبد الكريم أزوره. أحسن لما يسمع إني جيت هنا ولا رحتلوش يزعل مني. وان شاء الله لما ترجع تكون الست بتاعتك حضرت
- عثمان** : أيوه يا عمي. لأني أنا جاني تلغراف منها. بتقول فيه إنها ولدت بنت. وحاضره النهارده
- العم** : الحمد لله. السلام عليكم
- عثمان** : عليكم السلام. أما اوصلك لحد الباب (يخرجون)^(١)
- أم أحمد** : ياختي قطيعه. أما اخش اجيب لقه اغيّر للبننت. حاعمل إيه عقبال اللايم
- عثمان** : الحمد لله اللي خرج عمي. هي راحت فين أم أحمد. يا أم أحمد يا مراقي^(٢)
- أم أحمد** : استنى لما اجيب لقه للبننت
- عثمان** : لقه؟
- الداية** : هي راحت فين ست أم أحمد
- عثمان** : إنت جيت يا ست الداية؟
- الداية** : أيوه والولد أهه سمي. أحسن أنا رايحه لحد بيت واحده ست فيها الطلق وراجعلكو حالاً
- عثمان** : رايحه فين تعالي
- الداية** : لا لا راجعه حالاً. لحسن الوليه متغلبه
- عثمان** : طلق إيه ومتغلبه إيه الله يغلبكم ويغلب أبوكم.. ودا إيه كمان. إنت عرقت ولا؟ الله يلعن أبوك على أبو اللي جابوك. على أبو اللي خلفوك. على أبو اللي حا يقدموك. انرزي هنا جنب اختك. أختك أوسخ منك كمان^(٣)
- أضم** : إيقت جانم. لازم البيت دي نمرة ٣١
- عثمان** : ودا إيه كمان
- أضم** : {خوشلرم موشلرم بن أضم أغا

(١) حذف الحوار ما بين {...}.

(٢) إختصار جملة عثمان: هي راحت فين. يا أم أحمد.

(٣) إختصار جملة عثمان: متغلبه إيه الله يغلبكم ويغلب أبوكم. إخص الله يلعن أبوكم على أبو اللي جابوكم.



- عثمان : إرمي. إنت إيه
أضم : جانم أنا بوريه قاتل مقتول لارندن. جيب البنّت بتاع أنا هايدا
عثمان : إيه إيه. بتقول إيه حضرتك
أضم : لسه مش عارف. جانم موش فيه هنا عيال ميال ولاد ميلاد
عثمان : ولاد ميلاد إيه. آه دا لازم يكون دايه
أضم : شابوك شابوك. أنا كلم فيه هنا ولاد ميلاد^(١)
عثمان : هنا فيه ولاد مافيش ميلاد
أضم : إنت كلم إيه ديوس ميوس بربري فلفوس.^(٢) فلسفه ملسفه مش لازم.
بعدين والله بالله اكسر راسك
عثمان : يا أم أحمد
أضم : سكتر جنابات
عثمان : إخرس جنابات شنبات شربات حربات مساوات أبوك السقامات..
أضم : {ها ها ها. زرار يوك. أنا عايز البنّت بتاعي اللي مسكته الداية
عثمان : آه حضرتك أبو البنّت
أضم : إيقت أنا أبوه. فين البنّت المولود كاراتاه ماراتاه
عثمان : يا سيدي بس طول بالك. أهه عندك العيال اهم. شوف بنتك مين فيهم خده
أضم : إيقت جيبو البنّت بوريه^(٣) آه عفارم عفارم
عثمان : خازوق. دلوقت راح اقدم إيه لعمي.. اسمع إنت. اعمل معروف خليها
شويه لما اقدمها لعمي وبعدين خدها
أضم : هاهاها. سكتر بربري نز. لازم يمّسك البنّت بتاعي. بعدين خوشلم موشلم
كسر الدنيا (يخرج)

(١) إختصار الحوار ما بين {...}: أضم: خوشلم موشلم بن أضم آغا. جانم موش فيه هنا عيال ميال ولاد ميلاد.

(٢) حذف: ديوس ميوس بربري فلفوس.

(٣) تغيير الحوار ما بين {...}: أضم: زرار يوك

عثمان: زرار في عينك. إنت إيه
أضم: فين البنّت بتاعي اللي مسكته الداية
عثمان: آه حضرتك الأرنأوطي أبو البنّت
أضم: إيقت أنا أبوه
عثمان: أهه عندك الولاد. شوف بنتك مين فيهم خده.



- أم أحمد : تعالى فهمني إيه ده
عثمان : أفهمك إيه. دا ابو البنّت وجه خده
أم أحمد : خدها؟ يا لهوي أُمّال إيه دي
عثمان : دا الولد اللي جابته الدابة (موسيقى ١)
أم أحمد : {هي جابت الولد اللي قالت عليه (حركة من الخارج) شوف دا إيه ده
عثمان : باينه رجع ثاني والا إيه
أم أحمد : يه ما تروح تشوف مين
عثمان : دول الدادات والمراضع الي وصّى عليهم العمدة اتفضلوا يا ستات {^(١)
(موسيقى ٢) (لحن الدادات)

لحن الدادات^(٢)

مين عايزله دادة ذواقي	تربي له عياله بالسبع تلسن
الوادي يطلع واد حاتاباني	والبنّت فشر بنيه وجلسن
كمريرات شغل بلاد بره	في بلاد جوه مئًا مافيشي
نتحطّ في اليوم ميت مره	نلبس لك طبخو ومناويشي
شوفم دار آخر ساعه	عاملين في روحهم إيه ياختي
يا وليه عيب إنت وهي	إيش جاب لجاب يا ست زكية
إنتم جماعه ..	أما احنا عال حاجه ..
طب اتلهوا بلا كتر كلام	دادات وكمريرات إيه يا مدام
إننا مراضيع خفافي	ادبنا دا شيء مش خافي
البنّت بتطلع من ايدنا	أموره واللواد متعافي
ازاي تكونوا بميعاتكم	والشيخان دي وتداوا
مين بقف حاي شوف خلاعتكم	ويأتمنكو على ولاده

(١) حذف الحوار ما بين {..}.

(٢) تم حذف اللحن.



يه جاتكو ناويه يه جاتكو وكسه
المدريره ايش دخلها
البننت رسمالها دلالتها
سيبك يا شيخه م النتي دوله
يادلعدي اوغي ماتنسيشي
لازم تكون جد ماتمشيشي
اوغوا تنسوا إن بلادكم
خلفوهم جددوا فيهم
دا عماد حياتنا
العائله يا ناس العائله يا بيه
هي الوطن الصغير اللي يتبني عليه

شطب لانزل فيكو مباكسه
في الوش والبدرة يا حرمه
والرك برضه على الفرمة
عاملين لي روحهم بتوع اسكوله
إن الي تيري وتداددي
تخلفه كده في الدنيا دي
عايزه ليها أبطال من اولادكم
(..) أبائكم وأجدادكم
ههي عيلاتنا
من غير كلام كثير
مجد وسعد الوطن الكبير

أم أحمد : (داخله) {هو راح فين عثمان

عثمان حاروح فين آديني ايه

أم أحمد تعالى إنت بتقول الراجل خد البننت. والبننت ايه{^(١)

عثمان : إخ. بقى الراجل غلط وخذ الولد اللي جابته الداية؟ أه. أحسن أنا بختي كويس

أم أحمد : كويس إيه ووحش إيه. وهي راحت فين الداية

عثمان : أهي قالت إنها رايحه تولد واحده وجايه حالاً

أم أحمد : يا حوستي وإيه الرأي دلوقت. الوليه الداية حا تقول إيه لأم الولد

عثمان : تقول إيه. أهي بعد ما تيجي واقدّمهم لعمي. تبقى تاخذ البننت توديهها

لأمها. وتجيّب الولد تاني. (جرس)

أم أحمد : يه روح شوف مين

عثمان : لازم الست الداية (ينظر للخارج)

أم أحمد : هن. مين الداية

عثمان : دا العمدة وسعيد بيه

(١) تغيير الحوار ما بين {..}: أم أحمد: ولد. دي البننت موش الولد.



- أم أحمد : طب اسكت يا مسخم ماتتكلمش قدامهم
- عثمان : إعرف شغلك وياهم أنا خارج (يخرج)
- سعيد : تعالي هنا طمني. الداية جابت الولد وأخذت البنت
- أم أحمد : ولد إيه وبنت إيه
- سعيد : ليه فيه إيه
- أم أحمد : الداية جابت الولد. وراحت قال تولد واحد جه أبو البنت علشان ياخذها.
- جوزي نسي واداله الولد
- سعيد : يا خبر زي بعضه
- العمدة (من الخارج) أيوه
- سعيد : طب هس هس أحسن عمي جه
- العمدة : هو فين الولد يابن اخويا. خليني اشوفه واشبع منه
- سعيد : أهه في المرحيحه يا عمي. بس إياك ما ياخدش باله إنها بنت
- العمدة : يا صلات النبي أحسن. إلا قول لي يابن اخويا الولد ده شبه البنات كده ليه
- سعيد : إخ. دا حا ياخد باله
- العمدة : تكونش بتغشني يا سعيد يابن اخويا. دهدي دي بنت لابسه حلق اهه
- أم أحمد : يادي الحوسه
- العمدة : ما تفهموني هنا. إنتي ولدت بنت والا ولد
- أم أحمد : لا يا عمي ولد
- العمدة : وهو فين أُمال دي بنت
- أم أحمد : لا لا الولد بس خدته المرضعه تشممه شوية هوا
- سعيد : أيوه خدته المرضعه تشممه شوية طراوه
- أم أحمد : تعالي ويايا لما افهمك جوه تعالي (يخرجون)
- عثمان : (داخلًا) إيه خبر إيه^(١)
- سعيد : تعال هنا فهمني بالتفصيل إنت عملت إيه

(١) حذف: إيه خبر إيه.



عثمان : عملت إيه إيه^(١) الداية جابت ولد وخرجت من هنا. وأبو البننت طب من هنا. راجل أرتاؤوطي زي الوحش وكان حا يضربني بالسكين عاوز البننت. من خوفي شاورت له على الأولاد علشان ياخذ البننت بتاعه. خد الولد. أنا ذنبي إيه^(٢)

سعيد آه يا غبي
عثمان سيبك بقولك إنت مالکش قسمه إنك تورث. أنا بإذن الله اللي راح نورث ونفرسك

سعيد : طيب بس اتلهي
عثمان : اتلهي على فقرك إنت (جرس)
سعيد : روح شوف مين لازم الداية
عثمان : أيوه الحمد لله^(٣) (يخرج)
سعيد : أعود بالله. أهه دلوقت مافيش غير كوني اروح ابحت لي عن ولد. قبل ما تتفضح المسألة وعمي يحمرق تاني

عثمان : (داخلًا) إلحق إلحق
سعيد : إيه فيه إيه

عثمان : الست مراتك جت من اسكندرية
سعيد : مراقي؟ يادي الداهيه يادي الداهيه

العمدة : (من الداخل) مش ممكن لازم اشوف الولد
عثمان : إرمي^(٤) وآدي الخازوق الكبير

العمدة : هو فين ابن اخويا^(٥)
سعيد : آديني ايه يا عمي^(٦).. يا ساتر استر يا رب

العم : الولد فين
الزوجة : إنت يادلعدى يا جوزي

(١) تغيير "عملت إيه إيه": تصفيل إيه.

(٢) حذف: أنا ذنبي إيه.

(٣) تغيير "أيوه الحمد لله": لازم الداية.

(٤) تغيرت: آه.

(٥) حذف جملة العمدة.

(٦) حذف: آديني ايه يا عمي.



- عثمان : اكبس
- العمدة : جوزي
- سعيد : لا دي بتقول.. هس
- الزوجة : الله إيه العبارة
- أم أحمد : هس
- الزوجة : الله إيه
- عثمان : هس
- العمدة : دول مالهيم بيعملوا كده ليه. الست دي بدستور. تبقى مرات مين
- سعيد : أيوه فكره.. الست دي يا عمي تبقى مرأة عثمان
- العمدة : غريبه. بقى الست اللي زي مترد^(١) القشطه دي. تبقى مرأة الأسفلت ده
- عثمان : ليه هو حضرته ماكانش عارف إنها مراتي.. إزيك يا مراتي سلامات^(٢)
- الزوجة : الله الله. أما أنا حاتجنن. ما تفهموني إيه العبارة
- سعيد : وافقي أحسن لها أصل
- عثمان : آه يا مراتي (يقبلها)
- الزوجة : إيه ده
- عثمان : وافقي أحسن لها أصل^(٣)
- سعيد : إيه هو. إنت مجنون يا راجل إنت. عاوز تبوس الست كده قدامنا
- عثمان : شيء بارد. مراتي اعرف شغلي فيها.. علشان تجرب السلفيات وتعذر يا بارد
- العمدة : حقيقي بابن اخويا. الراجل حر في مراته. الحق على ابوها المغفل اللي جوزها لاسود الوش ده
- عثمان : قوله يا سيدي.. آه يا مراتي (يهم بتقبيلها)
- أم أحمد : إنت حا تطلع فيها والا إيه
- عثمان : أطلع فيها. أنا حانزل فيها^(٤)
- العمدة : طب وانت مالِك إنتِ يا فريدة هانم

(١) المقصود وعاء.

(٢) تم حذفها.

(٣) حذف جملة عثمان.

(٤) حذف جملة عثمان.



- أم أحمد : مالي أنا اغير عليه من الهوا مش جوزي
- الزوجة : ما تفهموني إيه العبارة يا ناس. إنتو مجانين
- العمدة : إخص. دي لسانها طويل زي جوزها
- الزوجة : إيه اللي جوزي يه. ما تفهموني
- سعيد : دلوقت جوزك يفهمك
- عثمان : أيوه تعالى أنا افهمك يا مراقي. عن إذنكو. إحنا داخلين جوه نستريح شويه^(١)
- سعيد : عن إذنكو أما افهم عم عثمان
- العمدة : {يا جماعه فهموني إيه الحكايه. دانا قربت اتلحس
- أم أحمد : لا لا سلامتك يا عمي. تعالى أنا افهمك أنا (يخرجان)
- العمدة : أيوه دا شيء يلحس اللي ما يتلحس^(٢)
- عثمان : (داخلًا) كويس. دلوقت لما يجي عمي. أقدم له مرآة سعيد بيه بصفة مراقي. والبنيت اللي جابته الداية. {مضبوط ثبتت وراثتي. يا ترى البنيت هنا. والا حد خده لآخر.. لا هنا. يا سلام. لكن دي البنيت دي بيضا خالص. خازوق لو عمي شافه ويعرف إنها موش بنتي. نعمل ازاي. أحسن شيء اخدها وعندي علبه الورنيش أورنشها علشان نسبك العبارة على عمي. (جرس) خازوق ليكون عمي
- العم : هن طمني. الست مراتك جت يا عثمان
- عثمان : أيوه جت
- العم : وولدت صحيح
- عثمان : أيوه يا عمي. جابت بنت زي القمر
- العم : بيضا خالص؟
- عثمان : آه. آدي اللي كنت حاسبه. لا عمي لا بيضا ولا سوده. بين البنين
- العم : آه يعني مولده. أيوه يا ابني. أما تكون الأم بيضا والأب اسود. يطلعوا الأولاد مولدين. وهي فين مراتك الست مراتك
- عثمان : هي بس دخلت الحمام علشان تغسل وشها من تراب السفر

(١) حذف: عن إذنكو. إحنا داخلين جوه نستريح شويه.

(٢) تغيير الحوار ما بين {...}: أم أحمد: وأنا عن إذنك يا عمي أنا رخه. (يحملها ويخرجان).



- العم** : عال عال. أما اروح اطلع فلوس من الشنطه بتاعي واجي حالاً (يخرج)
(موسيقى)
- عثمان** : أبوه على بال ما تغسل وشها وتجي.. أحسن شيء أنا آخذ البنت أورشها قبل
ما يجي عمي (ضجة) إيه دول كمان. آه دول الجماعة الموأجرين بتوع زعرب
بيه. اتفضلوا (يخرج) (موسيقى ٢)^(١)
- سعيد** : (داخلاً وأم أحمد) اسمعي يا أم أحمد. آديني فهمت الست مراقي على كل
حاجه. علشان نسبك العبارة على عمي. وهو فين عم عثمان علشان افهمه
لاخر. بس انا مش مجنني إلا عبارة الولد
- أم أحمد** : أهه عثمان يقول إن الداية حا ترجع تاني. أهه نبقي نخليها تودي البنت
وتجيب الولد.. يه يا ندامه البنت راحت فين
- سعيد** : إخ. ما داهيه لتكون الداية خدتها. هو فين عم عثمان بس
- أم أحمد** : ياسي عثمان
- سعيد** : يا عم عثمان
- عثمان** : (من الداخل) طول بالك أما المعها
- سعيد** : هيّ إيه اللي يلمعها. تعالى هنا.. إيه دي
- عثمان** : دي البنت اللي جابته الداية. ورنشتها علشان اقدمها لعمي بصفة بنتي
- سعيد** : أما راجل مغفل صحيح. إنت مجنون يا راجل
- عثمان** : مجنون إيه. أنا راج نورث حالاً
- أضم** : (من الخارج) خوشلرم موشلرم أنا هنا قاتل مقتول
(عثمان يسهم)
- سعيد** : إيه دا كمان
- عثمان** : هس دا الراجل الأرناؤوطي أبو البنت
- سعيد** : خلاص اتفضحننا
- العمدة** : هيه. جت المرضعه بالواد والا لسه
- سعيد** : خازوق.^(٢) لا يا عمي زمانها جايه دلوقت حالاً

(١) إختصار الحوار ما بين {..}: عثمان: لكن دي بيضا خالص. أحسن شيء عندي علية الورنيش بتاع الجزمه أورشه.
(٢) تم حذفها.



- العمدة** : حقيقي يا ابن اخويا. أنا إن ماجتش وشفت الولد بعيني. دانت تبقى أكبر نصاب في الدنيا
- أضم** : (من الخارج) باكسنا ماكسنا أنا أضم أغا
- العمدة** : إيه اللي بيزعق بره ده
- عثمان** : أبو البنت
- أم أحمد** : يا سيدي بس بلاش فضيحة
- العمدة** : بنت إيه. إيه اللي وياك ده
- عثمان** : دي دي
- سعيد** : دي دي
- العمدة** : دي إيه
- أضم** : (من الداخل) ديوس كرتاه كلب^(١)
- عثمان** : آه أحسن شي نبیض له^(٢) البنت ونديها له
- العم** : (داخلاً) خبر إيه الزيطه دي يا عثمان
- عثمان** : إخص. اتوخلنا زيادة^(٣)
- العم** : يا صلات النبي. دي بنتك دي يا عثمان
- عثمان** : اتفضحننا
- العم** : إيه دا يا ابن اخويا. نصه أبيض نصه أسود
- سعيد** : {يا نهار اسود
- عثمان** : لا يا عمي لا..
- العم** : لا إيه. أتكلم دي إيه^(٤)
- عثمان** : النص الأسود بتاعي والنص الأبيض بتاع امها

(١) حذف الحوار ما بين {...}.

(٢) تغيير "نبیض له": ننصف.

(٣) حذف جملة عثمان.

(٤) إختصار الحوار ما بين {...}: عثمان: لا يا عمي. العم: إتكلم.



- أضم** : (داخلًا) جانم لصوص نصوص فصوص. أنا جيتو مخصوص من شان امسك البربري. أنا اديته الولد للداية وجاي عايز البنت (عثمان يختفي) (يمسك العم) آه ديوس كراتاه جيبوا البنت بتاعي
- العم** : إيه ده إيه ده. {حوشو يا ناس
- عثمان** : سيّب الراجل يابن المركوب
- إخم** : آه إنت اللي أنا أدور عليه
- عثمان** : إوعى تمد إيدك. البنت بتاعك اهه مضروب بويه^(١)
- أضم** : دي وشه اسود
- عثمان** : ابقى وديه التانتورريه^(٢)
- أضم** : آه عفارم عفارم
- الزوجة** : (داخلًا) إيه الزيطه دي. إنتو عملتوا إيه
- العمدة** : إيه العبارة يا جماعه يا نور إنتو. ما تفهموني
- العم** : إيه الحكاياه دي يا عثمان
- عثمان** : بقى شوف يا عمي انا اقولك على الحقيقه. عبارة الولاد دي كذب في كذب. صحيح أنا مراتي كانت حبله ولكن جت تولد كدّبت
- العمدة** : تعالي هنا يا ابن اخويا. بقى الست دي مراته مش مراتك
- سعيد** : لا يا عمي أنا مراتي الحقيقه أهه. ولكن عبارة الأولاد دي ولو إنها أونظه.^(٣) فأنها في الحقيقه حركت في نفسنا الرغبة إننا نستقيم ونخلص لنسواننا ونخلّف منهم أولاد يجعلوا لنا ذكرى بعد مماننا
- العمدة** : طيب وانا حيث إن ربنا هداك كده. أنا مستعد اخذك اسلمك كل ممتلكاتي وأطيانني
- سعيد** : آه يا عمي
- العم** : وأنا كمان شرحه يا عثمان. بس يا خساره أنا كان نفسي في بنت
- عثمان** : مش بنت بس. أنا اعمل لك طزينه. خد مني عيال زي ما إنت عايز ما دام هم بشاير السعد^(٤)

(١) تغيير الحوار ما بين {...}: عثمان: اتفضل البنت بتاعك أهه.

(٢) كلمة باللغة الفرنسية "Teinturerie" وتعني: المغسلة لتنظيف الملابس.

(٣) تغيرت: كذب.

(٤) تغيير جملة عثمان: بس بنت. خد مني أولاد زي مانت عايز ما دام همّ بشاير السعد.



اللقن الختامي

يا جماعه زقطوا وهيصوا وغنوا بحبوا على روحكم قوي وانهوا
أهي دي الرواية اللي تفرح والتفريح مالكوش غنى عنه
كلها كام يوم (..) وتنصلح حاله يا أصبح

ستار



شكك هذه المراسم سنة ١٠٥٠ هـ - وفات في تمثيل
لأن يوم الأربعاء والخميس والجمعة. أما في طاهر
بمصر بلادي الماشية في

سعيد:	الهائم اسمها..
عثمان:	اسمها أم أحمد هائم
سعيد:	هس يا اخينا. اسمها فريدة هائم يا عمي
أم أحمد:	أيوه اسم حلو خفافي
العمدة:	عاشت الأسامي يا هائم. وحضرة أبو جناك مش من
	أرياب الأطيان
أم أحمد:	آه. أبويا من أرياب الأطيان
عثمان:	أيوه أبوها من أرياب الأطيان. لكن هي من أرياب
	السوابق
العمدة:	إيه يقول إيه ده

